

書記洞詮卷第四十六

江東 梅鼎祚 纂輯


晉 十一
東晉

王羲之 字逸少導從子歷右軍將軍會稽內史○一

遺殷浩書

浩揚州刺史參綜朝權與桓溫不協羲之以國家之安在於內外和因與浩書戒之浩不從及浩將北伐羲之以為必敗以書止之言甚切至浩遂行果為姚襄所敗復圖再舉仍遺浩書先是安西將軍謝尚為督統敗績

知安西敗喪公私惋怛不能須臾去懷以區區江左所營綜如此天下寒心固以久矣而加之敗喪此可



熟念往事豈復可追願思弘將來今天下寄命有所自隆中興之業政以道勝寬和爲本力爭武功作非所當因循所長以固大業想識其由來也自寇亂以來處內外之任者未有深謀遠慮括囊至計而疲竭根本各從所志竟無一功可論一事可記忠言嘉謀棄而莫用遂令天下將有土崩之勢何能不痛心悲慨也任其事者豈得辭四海之責追咎往事亦何所復及宜更虛已求賢當與有識共之不可復令忠允之言常屈於當權今軍破於外資竭於內保淮之志非復所及莫過還係長江都督將各復舊鎮自長江

以外羈縻而已任國鈞者引咎責躬深自貶降以謝百姓更與朝賢思布平正除其煩苛省其賦役與百姓更始庶可以允塞羣望救倒懸之急使君起於布衣任天下之重尚德之舉未能事事允稱當董統之任而喪敗至此恐闔朝羣賢未有與人分其謗者今亟脩德補闕廣延羣賢與之分任尚未知獲濟所期若猶以前事爲未工故復求之於分外宇宙雖廣自容何所知言不必用或取怨執政然當情慨所在正自不能不盡懷極言若必親征未達此旨果行者愚智所不解也願復與衆共之復被州符增運千石徵

後兼至皆以軍期對之喪氣罔知所厝自頃年割剝遺黎刑徒竟路殆同秦政惟未加參夷之刑耳恐勝廣之憂無復日矣

北堂書鈔載義之與浩書下官勸令畫廉閣於屏風

與會稽王牋

簡文帝初為會稽王輔政義之與王牋陳殷浩不宜北伐并論時事

古人耻其君不為堯舜北面之道豈不願尊其所事比隆往代況遇千載一時之運顧智力屈於當年何得不權輕重而處之也今雖有可欣之會內求諸已而所憂乃重於所欣傳云自非聖人外寧必有內憂今外不寧內憂已深古之弘大業者或不謀於衆傾

國以濟一時之功者亦往往而有之誠獨運之明足以邁衆暫勞之弊終獲永逸者可也求之於今可得擬議乎夫廟筭決勝必宜審量彼我萬全而後動功就之日便當因其衆而即其實今功未可期而遺黎殲盡萬不餘一旦千里饋糧自古為難況今轉運供繼西輸許洛北入黃河雖秦政之弊未至於此而十室之憂便以交至今運無還期徵求日重以區區吳越經緯天下十分之九不亾何待而不度德量力不弊不已此封內所痛心歎悼而莫敢吐誠往者不可諫來者猶可追願殿下更垂三思解而更張令殷浩

荀美還據合肥廣陵許昌譙郡梁彭城諸軍皆還保淮爲不可勝之基須根立勢舉謀之未晚此實當今策之上者若不行此社稷之憂可計日而待安危之機易於反掌考之虛實著於目前願運獨斷之明定之於一朝也地淺而言深豈不知其未易然古人處閭閻行陣之間尚或干時謀國評裁者不以爲譏況厠大臣未行豈可默而不言哉存亾所係決在行之不可復持疑後機不定之於此後欲悔之亦無及也殿下德冠宇內以公室輔朝最可直道行之致隆當年而未允物望受殊遇者所以寤寐長歎實爲殿下

惜之國家之慮深矣常恐伍員之憂不獨在昔麋鹿之游將不止林藪而已願殿下整廢虛遠之懷以救倒懸之急可謂以亾爲存轉禍爲福則宗廟之慶四海有賴矣

與尚書僕射謝安書

義之爲會稽時東土飢荒輒開倉賑貸朝廷賦役繁重吳會尤甚義之每上疏爭之事多見從又與安書

頃所陳論每蒙允納所以令下小得蘇息各安其業若不耳此一郡久以蹈東海矣今事之大者未布漕運是也言意望朝廷可申下定期委之所司勿復催

下但當歲終考其殿最長吏尤殿命檻車送詣天臺
三縣不舉二千石必免或可左降令在疆塞極難之
地又自吾到此從事常有四五兼以臺司及都水御
史行臺文符如雨倒錯違背不復可知吾又瞑目循
常推前取重者及綱紀輕者在五曹主者泣事未嘗
得十日吏民趨走功費萬計卿方任其重可徐尋所
言江左平日揚州一良刺史便足統之況以羣才而
更不理正由爲法不一牽制者衆思簡而易從便足
以保守成業倉督監耗盜官米動以萬計吾謂誅剪
一人其後便斷而時意不同近檢校諸縣無不皆爾

餘姚近十萬斛重斂以資姦吏令國用空乏良可歎
也自軍興以來征役及克運歿亾叛散不反者衆虛
耗至此而補代循常所在凋困莫知所出上命所差
上道多叛則吏及叛者席卷同去又有常制輒令其
家及同伍課捕課捕不禽家及同伍尋復亾叛百姓
流亾戶口日減其源在此又有百工醫寺歿亾絕滅
家戶空盡差代無所上命不絕事起或十年十五年
彈舉獲罪無懈怠而無益實事何以堪之謂自今諸
歿罪原輕者及五歲刑可以克此其減死者可長克
兵役五歲者可克襍工醫寺皆令移其家以實都邑

都邑既實是政之本又可絕其亾叛不移其家逃亾之患復如初耳今除罪而充襍役盡移其家小人愚迷或以爲重於殺戮可以絕姦刑名雖輕懲肅實重豈非適時之宜邪

並晉書

與謝安書

知君嘗得小笙笙是名器往聞者若令諸君聞之皆當可不言而云見今笙者皆不以爲佳恐是不能好也

又

復與君此章草所得極不爲少而筆至惡殊不稱意

並北堂書鈔

與謝安書

蜀中山水如峨眉山夏含霜電碑板之所聞崑崙之

伯仲也

楊云逸少慕蜀中山水之奇見於與周益州及謝東山書不一而足然竟不遂其雅志山水於高人亦有緣及限耶○蜀中舊有石刻今亾見峨眉山故志○輿地志山水作山川峨眉山作岷山

與桓温箋

萬再遷豫州刺史領淮南太守監司豫冀并四州軍事義之與温箋又與萬書温不從萬果敗○世說萬壽春敗後還書與右軍云慙負宿顧右軍答書曰此禹湯之戒

謝萬才流經通處廊廟參諷議故是後來一器而今屈其邁往之氣以俯順荒餘近是違才易務矣

並晉書○

一器通鑑
作之秀

誠謝萬書

萬為豫州都督義之遺書誠之萬不能用既受任北伐矜豪傲物兵潰被廢

以君邁往不屑之韻而俯同群辟誠難為意也然所謂通識正自當隨事行藏乃為遠耳願君每與士之下者同則盡善矣食不二味居不重席此復何有而古人以為美談濟否所由實在積小以致高大君其存之

與吏部郎謝萬書

萬字萬石安之弟

義之與王述齊名而志尚不同兩不相能述為會稽以母喪居郡境義之代為郡累年止

一弔竟不顧述及述為揚州刺史檢校會稽求其得失主者疲於課對義之耻慨遂稱疾去郡於父母墓前自誓不復仕朝廷以其誓苦亦不復徵之與東土人士窮諸名山汎滄海優游無事弋釣為娛與萬書

古之辭世者或被髮佯狂或汚身穢跡可謂艱矣今僕坐而獲免遂其宿心其為慶幸豈非天賜違天不祥頃東游還脩植桑果今盛敷榮率諸子抱弱孫游觀其間有一味之甘割而分之以娛目前雖植德無殊邈猶欲教養子孫以敦厚退讓戒以輕薄庶令舉策數馬彷彿萬石之風君謂此何如比當與安石東游山海并行田視地利願養閑曠衣食之餘欲與親

知時共歡讌雖不能與言高詠銜杯引滿語田里所
行故以為撫掌之資其為得意可勝言耶常依陸賈
班嗣楊王孫之處世甚欲希風數子老夫志願盡於
此矣中興書○閒曠晉書作閒暇此矣作此也○法
書要錄載云老夫志願盡於此也君察此當有
二言不真所謂賢者志於大不肖志其小無緣見君
故悉心而言以當一面何如下要錄有重熙去視
作盡曠作暇○容齋隨筆云逸少蓋溫太真蔡謨謝
安石一等人也直以抗懷物外不為人役故功名成
就無一可言其操履識見議論閎卓當世亦少其比
而為書名所蓋後世但以翰墨稱藝之為累大哉

與人書

羲之每自稱我書比鍾繇當抗行
比張芝草猶當鴈行也會與人書

張芝臨池學書池水盡黑使人耽之若是未必後之

也

晉書○法書要錄載王右軍自論書吾書比之鍾
張當抗行或謂過之張草猶當鴈行張精熟過人
臨池學書池水盡墨若吾耽之若此未必謝之
云由此觀之右軍之聖於書亦由積習苦學而能也
今有妄男子師心狂塗信手繆繞以誑愚俗而張虛
名使右軍家奴有靈必見咲於地下矣豈復有書乎

又

君學書有意今相與草書一卷

法書要錄○張懷瓘
書斷云右軍草草八
分飛白章行備精諸體自成一家千變萬化得之神
功○唐張彥遠法書要錄右軍書記至四百六十五
帖其中如蘭亭之屬多非書記淳化帖所載亦僅什
一蓋諸蹟宋初已散逸矣今與閣帖各以類次于後

章草帖

皇象章草旨信送之勿勿當付良信

楊云旨信送之
答其人來旨欲

信送之也勿勿當付良信言此際勿遽不暇後當付
良使也信即使也今法帖作勿三非○淳化帖七十

四○宋太宗淳化中命侍書王著集古法書為閣帖右軍父子五卷此前有法書要錄其後有建中靖國淳熙續帖清華閣寶晉齋書史東觀餘論甲秀萬王之屬今各類從淳化復注次第以便臨撫訛脫仍舊

與所知書

王獻之好書觸遇造玄嘗日戲北館取掃帚沾泥汁中以書壁作方丈一字掩暖斐疊極有好勢義之見而歎其美問誰所作答曰七郎羲之於是作書與所知

子敬飛白大有意

梁虞龢進書表○圖書會粹載云字亦晉人然鼎按後漢曹大家女誠述其子曹成之字曰子毅張母呼其子張邵之字曰元伯豈有望耶則漢時母固有稱子字者而鼂錯父呼子為公

飛白帖

省飛白乃致佳造次尋之乃欲窮本無論小進也稱

此將青於藍淳化八十二

又

致此四紙飛白以為何似能學不淳化九十一

又

飛白不能乃佳意乃篤好此書至難或作復與卿淳化

一百四十一○楊用修注云右軍飛白妙絕今古今不可見矣臨池之士亦不知飛白何體也唐順陵碑文中書有數字可觀古跡鼎按齊蕭子良古今書體云飛白書熹平年治鴻都門於時蔡邕方撰聖皇篇梁庚元威論書云張芝始作一筆飛白書

辭舉帖

此下並右軍論事諸帖不詳何與

前得君書即有反想至也謂君前書是戲言耳亦或

謂君當是舉不失親在安石耳省君今示頗知如何
老僕之懷謂君體之方復致斯言愧誠心之不著若
僕世懷不盡前者自當端坐觀時直方其道或將爲
世大明耶政有救其弊缺筭之熟悉不因放恕之會
得期於奉身而退良有已良有已此共得之心不待
多言又餘年幾何而逝者相尋此最所懷之重者頃
勞藥石之資如有萬一方欲思盡願養過此以往未
之敢聞言盡於今也

辭郡帖

義之嘗請爲宣城朝廷
不許因爲會稽內史

篤不喜見客篤不堪煩事此自然不可化而人理所
重如此都郡江東所聚自非復弱幹所堪足下未知
之耳給領與卿同殊爲過差交人士因開門以勉待
之無所復言

恭命帖

六日昨書信未得去時尋復逼或謂不可以不恭命
遂不獲已處世之道盡矣何所復言

殊遇帖

羲之歿罪復蒙殊遇求之本心公私愧歎無言以喻
去月十一日發都違遠朝廷親舊乖離情懸兼至良
不可言且轉遠非徒無諮覲之由音問轉復難通情

書言滙註 卷四十六
慨深矣故旨遣承問還願具告義之歿罪

會稽帖

會稽亦復與選論卿否吾誠勅勅於論事然於弟尚
不惜小宜謂選官前意已佳可不復煩重卿更思必
謂宜論者必有違矣

並法書
要錄

此郡帖

此郡之弊不謂頓至於此諸通滯非復一條獨坐不
知何以爲治自非常才所濟吾無故舍逸而就勞歎
恨無所復及耳夏人事請託亦所未免小却冀得小
差頃日當何理

米云蘇耆書畫記述此帖與內史王
述書黃伯思云非也逸少與藍田方

隙而爲屬郡既檢察苛急主者疲於課對正救過不
暇豈復尺牘間自彰其通滯哉此帖官本傳摹甚失
真如以就勞爲能勞小却爲小都皆轉失草法也○
淳化一百五十三○免一作見劉次莊作忽頃作須

上虞縣事帖

賊以還不知遇官軍云何可深憂之欲依上虞初到
別上今勅聽之縣事不同直不相連耳

又

近所示欲依上虞別上申一期尋案臺報不聽上當
戮力於事不可但復解散君縣乃是今勝縣而復以
爲難耶

又 此似卽
言前事

書言淵詔 卷四十六
知足下以界內有此事便欲去縣豈有此理此縣弊
久因足下始有次第耳便當息意今勅諸處事及
縣者省馳書於臺中論必釋然故遣旨信示意

諸暨帖

諸暨始寧屬事自可得如教丹陽意簡而理通屬所
無復逮錄之煩爲佳想君不復須言謝丹陽亦云此
語君

餘姚帖

足下所欲餘姚地輒勅驗所須輒告

軍府帖

此三頃田樂吳舊耳云卿軍府甚多田也宜須一用
心吏可差次忠良

湖孰帖

吾湖孰縣須水田卿都可遣僦之墓不知處去年僦
之者似是俞進可問之卿不出停此

郡荒帖

知郡荒吾前東周旋五千里所在皆爾可歎江東自
有大頓勢不知何方以救其弊民事自欲歎復爲意
卿示聊及

斷酒帖

言言清言 卷四十一
斷酒事終不見許然守之尚堅弟亦當思同此懷此
郡斷酒一年所省百餘萬斛米乃過於租此救民命
當可勝言近復重論相賞有理卿可復論

並法書
要錄

又

百姓之命

缺

倒懸吾夙夜憂此時既不能開倉庾

賑之因斷酒以救民命有何不可而刑猶至此使人
歎息吾復何在便可放之其罰譴之制宜嚴重可如
治日每知卿同在民之主

絳帖

奉法帖

省示知足下奉法轉到勝理極此此故蕩滌塵垢研

遣滯累可謂盡矣無以復加漆園比之殊誕謾如下
言也吾所奉設教意政同但爲形跡小異耳方欲盡
心此事所以重增辭世之篤今雖形係於俗誠心終
日常在於此足下試觀其終

故一作散
累作慮

簿書帖

恐有簿書之煩益屬所事可立制縣不給下貧而給
饒有之家開令治國別許爲盛田不平者嚴制如此
事省而虛實可知其或非所樂而絕付給者今爲不
賦得里人遂安黃籍前年皆斯人非復一條可歎今
便獨坐令白郗侯求官邈等想必可得君亦當得見

書若萬一不樂想可共思得州數十家見經營不爾
無坐此理也別當以具慰深共思不待煩言

增運帖

增運白米來者云必行此無所復云吾於時地甚疏
卑致言誠不易然以在大臣之末要爲居時任豈可
坐視危難今便極言於相并與殷謝書皆封示卿勿
廣宣之諸人皆謂盡當今事宜直恐不能行耳足下
亦不可思致若言耶人之至誠故當有所面不爾坐
待死耳

然下有太
老子三字

又

知數致苦言於相時弊亦何可不耳頗得應對不吾
書未被答得桓護軍書云口米增運皆當停爲善

防民帖

行當是防民流逸不以爲利耶此於郡爲由上守郡
更尋詳若不由上命而斷中求絕者此爲以利卿絕
之是也縱民所之恐有如向者流散之患可無善詳
具聞

又一帖民作臣不以作不
當上守郡作耶斷作郎

深情帖

省足下前後書未嘗不憂欲與事地相與有深情者
何能不恨然古人云行其道忘其爲身真卿今日之

謂政自當豁其胷懷然得公平政直耳未能忘已便
自不得行然此皆在足下懷願卿為復廣求於衆所
悟故多山之高言
次何能不

從宜帖

省告一一足下此舉由來吾所具卿所云皆是情言
然權事慮之重則當廢情以從宜非書所悉見卿一
一

玄同帖

論亦不能佳體懷省無所乏然卿供給人士及使役
吏人論者亦謂大任意在世中政自不得不小俯仰

同異卿復為意卿此懷亦當玄同不能勉人耳

誠理帖

知以智之所無奈何不復稍憂此誠理也然缺之

懷何能已已乎未能得面書何所悉但深得近期覽
還故因教初日

月

資生帖

上方寬博多通資生有十倍之覺是所委息乃有南
眷情足謂何以密示一勿宣此意為與卿共思之省
以付火

慕容帖

諸人十二日書云慕容乃抄梁下得數缺目下疾疫非常乃以至京極有傷此憂之下者想君勤勤之

渭南帖

二十三日發至長安云渭南患無他然云符健衆尚七萬苟及最近雖衆由匹夫耳卽今尅此一段不知歲終云何守之想勝才弘之自當有方耳

方軌帖

賊勢可見此云方軌萬萬如志但守之尚足令智者勞心此回書恒懷湯火處世不易豈惟公道並法書要錄

羣凶帖

卿事時了甚快羣凶日夕云云此使鄴下一日爲戰場極令人惆悵豈復有慶年之樂耶思卿一面無緣可歎可歎米芾書史

送袍帖

二王作諸問帖

十四日諸啓如昨云西有伐蜀意復是大事速送袍來

給船帖

君欲船輒勅給所須告之

功曹帖

省告攝功曹事一一屬以所求寬通廢守命必欲肅

書言洞詮 卷四十六
之是以間意其志既立不得不必行

發詔帖

遂當發詔催吾帝王之命是何等事而辱在草澤憂
歎之懷當復何言見足下一

軍使帖

直遣軍使者可各差十五人耶合三十人足周事

仲舒帖

足下似有董仲舒開閉陰陽法可勅令料付不雨憂
之深珍重 謝二侯

尚書帖

見尚書一日遣信以具必宜有行者情事恐不可委
行使耶遲還具問亦以與尚書諮懷今復遣諮吳興
也

志嶠帖

良深路滯久矣況今季末無所多惟足荒何卹於此
足下志嶠外有由來及然以勢觀之卿入貴於不令
耳書政當爾王羲之白

此聲帖

吾爲卿任此聲者但此懷自不復得闕之於時

又

足下當爲遠慮不可計目前

又

所欲論事今付

荀葛帖

羲之歿罪荀葛各一國佐命宗臣觀其轍迹實竒士也然荀獲譏於憂卒意長恨恨謂其弘濟之心宜被大道諸葛經國達治無間然處事而無玷累獲全名於數代至於建鼎足之勢未能忘已所謂命世大才以天下爲心者容得爾乎前試論意久欲呈多疾憤憤遂忘致今送願因暇日可垂試省大期賢達興廢

之道不審謂粗得阡陌不

文集帖

此下
言文

比日尋省卿文集雖不能悉周徧尋翫以爲佳者名固不虛序述高士所傳小有異同見卿一一問應止楊王孫前以共及意同可誠述叙之耶暇日無爲想不怠之

歌章帖

歌章輒付卿或有寫書人者可寫一道與吾也

戲詠帖

得君戲詠承念至此年乃未見

並法書
要錄

月儀書

此似元會詩之屬當非書牋也與索靖月儀帖不同

日往月來元正晉祚太簇告辰微陽始布罄無不宜

和神養繁

初學記



國家圖書館, NATIONAL CENTRAL LIBRARY, TAIWAN, R.O.C.

書記洞詮卷第四十七

江東 梅鼎祚 纂輯

晉 十三

王羲之 二

十七帖 二十七條

張彥遠法書要錄右軍書記云十七帖長一丈二尺即貞觀中內本一百七行九百四十二字是烜赫著名帖也十七帖者以卷首有十七日字故號之二王書後人亦有內一句稍異者標為帖名大約多取卷首三兩字及帖首三兩字也 黃伯思云當時書卷首帖有十七日字故諸帖總謂之十七耳非帖數也本二十七條今官法帖有其十五散真逸少書三卷中又續法帖有五而印竹杖絲布衣漢講堂諸葛顯天鼠膏四果種虞安吉七

國家圖書館 NATIONAL CENTRAL LIBRARY, TAIWAN, R.O.C.

條不載當是亡軼而世有完卷者傳模殊精
非此比也此卷有帖云周益州送此印竹杖
云云案十七帖有云去夏足下致印竹杖云
云以前帖觀之即知此帖蓋與周益州矣自
昔相傳十七帖乃逸少與蜀太守者未必盡
然然其中間蜀事為多是亦應皆與周益州
書也但來禽一帖則或以為與桓温而已本
朝僧邦者有寄李昌武翰林詩云來禽簡寄
桓宣武不知何據案此帖有云今在田里惟
以此為事足下致此予者大惠也逸少視桓
公位殊遠絕與書不當爾耳然當時真長子
猷輩猶嫚侮桓公彼亦能容逸少作書若交
友益無足恠温飛卿詩云畫圖驚畏獸書帖
得來禽此帖垂寶非一世也○按周撫永和
三年為益州刺史有惠政見成都古今記據
黃則十七帖悉與周益州書矣內如來居龍
保六日胡毋從妹等並不似與周書六日帖
叔當西耶語猶非類揚用脩四川總志載七
十印竹諸葛顯譙周山川諸奇講堂嚴君平
鹽井八帖為與周益州亦以八帖皆論益州

故實耳要錄所載數止二十而無絲布衣理
竹杖七十胡毋鹽井五條君服食久合積雪
疑寒嚴君平併譙周為一帖今傳十七帖講
堂以後並闕然右軍法書此最先出故仍舊
統題十七帖若淳化長沙二王有帖名者附
注各下○米云關杞嘗謂余曰昔越州一寺
修佛殿於梁棋內藏一函古摸數十本所可
記者王右軍十七帖虞世南枕卧等帖皆有
儲氏圖書印黃亦云十七帖必多臨本永禪
師及虞世南褚庭誨臨字皆不甚遠故世有
數本皆不同此帖
全是庭誨筆意

十七日先書郗司馬未去即日得足下書為慰先書
以具示復數字復一在 以下

又逸民帖

吾前東粗足作佳觀吾為逸民之懷久矣足下何以

方復及此似夢中語耶無緣言面為歎書何能悉

一作等○二王帖云新安所刻至數字而止自吾前東粗足作佳觀以下自為四行恐是二帖然他本皆合為一長沙帖又誤併來居一帖

又來居帖

瞻近無緣省告但有悲歎足下小大悉平安也云卿

當來居此喜遲不可言想必果言告有期耳亦度卿

當不居京此既僻又節氣佳是以欣卿來也此信旨

還具示問新安○告一並作若僻案刻是避字要錄作僻或刻傳久小誤耳二王帖云避與僻

皆與辟通用非也避安可通辟

又龍保帖

龍保等平安也謝之甚遲見卿甥可早至為簡隔也

新安○早疑是耳○淳化一百五○見下有之字無卿舅以下

又絲布衣帖

今往絲布單衣財一端示致意

又七十帖○尺牘作與周益州

足下今年政七十耶知體氣常佳此大慶也想復勲

加願養吾年垂耳順推之人理得爾以為厚幸但恐

前路轉欲逼耳以爾要欲一游目汶領非復常言足

下但當保護以俟此期勿謂虛言得果此緣一段奇

事也揚云汶古岷字見史記○淳化一百十一

又

省別具足下小大問為慰多分張念足下懸情武昌
諸子亦多遠宦足下兼懷竝數問不老婦頃疾篤救
命恒憂慮餘粗平安知足下情至淳化

又六月帖○十七
帖無六日二字

六日知足下行至吳念違離不可居叔當西耶遲知

問新安○淳化帖離不可
居叔當西耶遲知問

又積雪凝
寒帖

計與足下別廿六年於今雖時書問不解濶懷省足
下先後二書但增歎慨頃積雪凝寒五十年中所無

想頃如常冀來夏秋間或復得足下問耳比者悠悠
如何可言

又服食帖○法書要
錄合上為一帖

吾服食久猶為劣劣大都比之年時為復可耳足下
保愛為上臨書但有惆悵並長沙○淳化帖愛為上
臨書但有惆悵知足下行

至吳
念違

又叩竹杖帖○尺
牘作答周益州

去夏得足下致叩竹杖皆至此士人多有尊老者皆
即分布令知足下遠惠之至長沙○士尺牘作土○
叩山在蜀生竹高節可

作杖見
張騫傳

又都邑帖

旦夕都邑動靜清和想足下使還具時州將桓公告慰情企足下數使命也謝無奕外任數書問無他仁祖日往言尋悲酸如何可言淳化十一〇具施作乙乙

又諸從帖

諸從竝數有問粗平安唯脩載在遠音問不數懸情司州疾篤不果西公私可恨足下所云皆盡事勢吾無間然諸問想足下別具不復乙乙淳化十三〇乙乙一作具

又胡母從妹帖

胡母氏從妹平安故在永興居去此七十也吾在官

諸理極差頃比復勿勿來示云與其婢問來信缺不

得也新安〇二王帖云永興今蕭山縣諸理極差言有過差也疑指求分會稽為越州事

又胡桃帖

得足下旃蜀胡桃藥二種知足下至戎鹽乃要也是服食所須知足下謂須服食方回近之未許吾此志知我者希此有成言無緣見卿以當一笑淳化十七須一作頤

又蜀都帖一名山川諸奇帖

省足下別疏具彼土山川諸奇揚雄蜀都左太沖三都殊為不備悉彼故為多奇益令其游目意足也可得果當告卿求迎少人足耳至時示意遲此期真以

日爲歲想足下鎮彼土未有動理耳要欲及卿在彼
登汶嶺峨眉而旋實不朽之盛事但言此心以馳於

彼矣

淳化二十二○迦
一作近又作進

又講堂帖

知有漢時講堂在是漢何帝時立此知畫三皇五帝
以來備有畫又精妙甚可觀也彼有能畫者不欲因
摹取當可不須具告

長沙○須
一作信

又譙周帖

云譙周有孫高尚不出今爲所在其人有以副此志
不令人依依足下具示

大觀帖○淳化無
爲所在至志十字

又淳化及要錄
合譙周一帖

嚴君平司馬相如揚子雲皆有後否

大觀帖
米云真

又

天鼠膏治耳聾有驗不有驗者乃是要藥

又朱處
仁帖

朱處仁今所在往得其書信遂不取答今因足下答

其書可令必達

黃云謂昔嘗得其書而信人竟不取
報書世俗遂誤讀爲往得其書信殊

不知信者乃使人
也○淳化一百八

又成都
池帖

往在都見諸葛顯曾具問蜀中事云成都城池門屋

樓觀皆是秦時司馬錯所脩令人遠想慨然為爾不

信一一示為欲廣異聞長沙慨然止

又鹽井帖

彼鹽井火井皆有不足下目見不為欲廣異聞具示

淳化一百十

又來禽帖○二王帖足下所疏別為一帖

青李來禽櫻桃日給藤子皆囊盛為佳函封多不生

足下所疏云此果佳可為致子當種之此種彼胡桃

皆生也吾篤喜種果今在田里惟以此為事故遠及

足下致此子者大惠也黃伯思跋唐摹十七帖云予嘗見畢文將叔云家有唐初

人所摹此帖來禽等四物外又有密蒙華一種故先相文簡公荅王黃門寄密蒙華詩云多病眼昏書懶讀煩君遠寄密蒙華愁無內史詞兼筆為覺真方到海涯今諸本並無此一種法書要錄亦不載

又

彼所須此藥草可示當致

又薦虞安吉帖

虞安吉者昔與共事常念之今為殿中將軍前過云

與足下中表不以年老甚欲與足下為下寮意其資

可得小郡足下可思致之耶所念故遠及並長沙帖

又兒女帖

吾有七兒一女皆同生婚娶以畢惟一小者尚未婚

耳過此一婚便得至彼今內外孫有十六人足慰目

前足下情至委曲故具示

淳化二十一已上並十七帖

桓公帖

凡稱某帖者非與此人也帖言其人耳聊以其名類次如桓公仁祖之屬

得都下九日書見桓公當陽去月九日書久當至洛

但遲遲可憂耳蔡公遂委篤又加瘳下日數十行深

可憂慮得仁祖廿六日問疾更委篤深可憂當今人

物眇然而艱疾若此令人短氣

淳化六十○黃云九日帖云蔡公者蔡謨

也仁祖者謝尚也晉穆帝永和十二年秋桓公破姚襄至洛故此云久當至洛是時將以謝尚鎮司州以病止故此云得仁祖二十六日問疾更委篤與陶穀所畜破羌帖事正同跋云晉穆帝永和十二年秋桓溫破姚襄于伊水遂至洛時將以謝尚鎮之屬病不行所云桓公摧破羌賊及仁祖小差正當時事也是

時逸少去會稽內史已歲餘方遯跡山水間宜不復以世務經懷而此書乃歎宣武之威畧悲舊都之始平憂國嗟時志猶不息惜其一憤遠引使才猷約結弗光於世獨區區遺翰見寶後人覽之深為興歎

又

破羌帖一作王畧帖

知虞帥云桓公以至洛即摧破羌賊賊重命想必禽

之王略始及舊都使人悲慨深此公威略實著自當

求之於古真可以戰使人歎息知仁祖小差此慰可

言適范生書如其語無異故須後問為定今以書示

君

寶晉齋舊帖○帥云一作帥書

又

得謝范六日書為慰桓公威勳當求之古今令人歎息

比當集姚襄也

法書
要錄

又

虞義
興帖

虞義興適送此桓公摧寇罔不如志今以當平定古
人之美不足比蹤使人歎慨無以為喻

賜書
堂帖

又

數得桓公問疾轉佳也每懸胡云征事未有日佳也
以逼勢不知卒云何爾

又

鄙故勿勿飲日三斛小行四升至可憂慮如桓公書
旨闕其不去恐不能平

又

桓公以江州還臺選每事勝也不可當在誰耳

雲子帖

桓雲字雲
子溫兄

桓公不得叙情不可居處雲子諸人何似耿耿能數
省否

又

云停雲子代萬頃桓公至今今荀臨淮權領其府懷
祖都共事已行

又

義之歿罪前得雲子諸人書竝毀頓胡之惟分推難

爲心當有分西者否義之歿罪

又

十四日疏昨信未即取遣適得孔彭祖書得其弟都下七日書說雲子暴霍亂亾人理乃當可耳惋惋桓公周生之痛豈可爲心

並法書要錄

安西帖

庾翼字稚恭安西將軍

一昨得安西六日書無他無所知說故不復付送讓都督表亦復常言耳如兄子書道嵩自必果今復與書督之足下勅令至并與遠書也

淳化一百四十五黃云翼鎮荊州

以石虎衰暴婁表北伐康帝及朝士皆遣使譬止孫綽輩亦致書諫之則逸少所見之表殆亦論北伐事

也翼之此舉朝論弗以爲然故逸少以爲常言及聞其遷襄陽乃云稚恭遂進鎮東西齊舉想尅定有期也則始雖同羣議而終以爲當然翼有志無年徒能奮十倍之氣而茂一統之功此志士所嗟慨者○知一作大督劉作共誤○又一帖云無所知表亦復常言耳

又稚恭帖

義之歿罪伏想朝廷清和稚恭遂進鎮東西齊舉想尅定有期也義之歿罪歿罪

書史

又清和帖

伏想清和士人皆佳適桓公十月末書爲慰云所在荒甚可憂殷生數問北事勢復云何想安西以至能數面不或云頓歷陽爾耶無緣同爲歎遲知問

淳化一百

又

運民不可得而要當得甚慮叛散頃為此足勞人意

大觀帖○淳化頃
為七字另一行

又

安復後問不想必停君諸舍疾苦差也便疾綿篤了
不欲食轉側須人憂懷深小妹亦故進退不孤得散
力煩不得眠食至少疾患經月兼焦勞不可言迎集
中表親疏略盡實望投老得盡田里骨肉之歡此一
條不謝二疏而人理難知此不知小却得遂本心不

交衰朽羸劣所憂營如此君視是願養之功當有何
理今都絕思此事也冀疾患差末秋初冬必思與諸
君一佳集遣無益快共為樂欲以少日補頃者之慘
戚也追尋前者意事豈可復得且當率目前及當此
急要願諸君各保愛以俟此期未近見君有諸結力
聊以當面各間意必欲省安西知今意無前却也想
君必俱賊勢可之者必進許洛無可不果相遇于一
世豈可度之尋常以此至終故當極盡志氣之所托
也君此意弘足然決在必行

結下一
無力字

當面止似為一帖○少
日一作省戚一作感

又

得征西近書委悉為慰不得安西許有問不知何久
長風書平安今知殷侯不久留之甚善甚善

庾丹陽帖

庾蘇升平中代
孔嚴為丹陽尹

知庾丹陽差數深深致心致心

並法書
要錄

又

適知十五日問清和為慰復得南後問不想二庾速
王之始與奴長就令人邑邑想無所至耳還具示問

淳化四十四○庾一作康陳作
庚速一作建王作至至作主

丹陽帖

昨即得丹陽水上書與足下書同故不送昨諸書付
還

又

想大小皆佳丹陽頃極佳也云自有書不附此信耳
大小問多患懸心想二奴母子佳遲卿問也

又

丹陽旦送吾體氣極佳共在卿故處增思詠

並法書
要錄

又

知比得丹陽書甚慰乖離之歎當復可言尋答其書
足下反事復行便為索然良不可言此亦分耳遲面

具比一作以當一作尚反作友
具作一一〇淳化八十三

殷侯帖殷浩見前

昨送諸書令示卿想見之恐殷侯必行義望雖宜爾然今此集信為未易卿若便西者良不可言

又

昨得殷侯答書今寫示君承無怒意既而意謂速思順從或有怨理大小宜盤桓或至嫌也想復深思此

帖似為言浩北伐事〇又一帖意作詔速作連怨理大小宜作怨望其不宜

又孔嚴字彭祖殷浩臨揚州請為別駕

得孔彭祖十七日具問為慰云襄經還蠡是反善之

誠也於殷必得速還無復道路之憂比者尚懸悒得

其去月書省之悲慨也殷浩為中軍將軍北伐時羌帥姚襄降浩使龍驤將軍劉

啓守譙遷襄於梁襄遂反浩退保譙城器械軍儲皆為襄所掠

又

得豫章書為慰想以具問昨得都十七日書賊徑還蠡臺不攻譙是其反善之誠也想殷生得過此者猶令人憂期諸處分猶未定牟參軍旦夕至也遲一一

即言前書事

又

殷廢責事便行也令人歎悵無已此言浩廢徙東陽

又

云殷生得快罔大事數謝生書但有藥耳云彥仁或
宣城甚佳情事實宜今有二云想深復征許也

又

與殷侯彼此格卿取

又

與殷侯物示當爾不可不卿定之勿疑

並法書要錄

又宰相安和帖

宰相安和殷生無恙時面兄當宣兄懷

黃云宰相安和帖乃郝情

書宰相者簡文作相王時殷生者殷浩也然此或是書郝情帖語耳而結字實近世偽作○淳化十五

彭祖帖

想清和士人皆佳彭祖諸人得足下慰旦夕也此諸
賢平安每面粗有歎慨追恨近日不得本善散無已
已度足下還期不久耳此者數令知問

袁彭祖帖

袁彭祖何日過江想安穩耳失此諸賢至不可言足
下分離如何可言

孔建安帖

太保思一散知足下歸乃至孔建安家熱乃爾往還
以十實非之所堪若之不復更尅近道惟命是往矣

言淵詒 卷四十七
與郝家論婚書

十一月四日右將軍會稽內史瑯邪王羲之敢致書
司空高平郝公足下上祖舒散騎常侍撫軍將軍會
稽內史鎮軍儀同三司夫人右將軍劉缺女誕晏之
允之允之建威將軍錢塘令會稽都尉義興太守南
中郎將江州刺史衛將軍夫人散騎常侍荀文女誕
希之仲之及尊叔廙平南將軍荊州刺史侍中驃騎
將軍武陵康侯夫人雍州刺史濟陰郝說女誕頤之
胡之耆之美之內兄胡之侍中丹陽尹西中郎將司
州刺史妻常侍譙國夏侯女誕茂之承之羲之妻太

宰高平郝鑿女誕玄之凝之肅之徽之操之獻之肅
之授中書郎驃騎諮議太子左率不就徽之黃門郎
獻之字子敬少有清譽善隸書咄咄逼人仰與公宿
舊通家光陰相接承公賢女淑質直亮確懿純美敢
欲使子敬爲門閭之賓故具書祖宗職諱可否之言
進退惟命羲之再拜

法書要錄○張云此是郝家論婚書書迹似夫人

方回帖

郝情字方回見前

方回遂舉爲侍中不知卒行不云相意未許爾者爲
佳比得其書云山海間民迹亾殊異永嘉乃以五百
戶去深可憂深可憂此間不乃至此足下郡內云何

言言清語 卷四
糧遲日廣遠恐此不弊不已

又

方回遂舉爲侍中都下書云般生議論殊異處憂之道故思同歲寒盡對此書還

並法書
要錄

又

二謝在此近終日不同之此歎恨不得方回知春後問令人怛怛

之一作同春施作幸
幸○淳化五十八

重熙帖

郗曇字重熙鑒之子羲之
妻曇之姊也○御世帖

古之御世者乃志小天下今封域區區一方任耳而恒憂不治爲時耻之但令卿重熙之徒必得申其道

更自行有餘力相弘也

又

重熙去具今子日與曹論謝嶧吾又不下蔡書一一足下清談想必有理耳長任比得解未吾與江生論書答如此足下思所向示之要至懷也須卿示

並法書
要錄

又

適重熙書如此果爾乃甚可憂張平不立勢向河南者不知諸侯何以當之熙表故未出不說說苟侯疾患想當轉佳耳若熙自勉此一役當可言淺見實不見今時兵任可處理

淳化五十七○郗曇傳北中郎
荀羨有疾朝廷以曇爲羨軍司

書言洞語 卷四
羨征還除曇北中郎將都督徐兗青幽揚州之晉陵諸軍事鎮下邳是也

又

足下小大佳也諸疾苦憂勞非一如何復得都下近問不吾得敬和二十三日書無他重熙住定為善

謝二侯

此三字又一行

又

重熙八日過信安

海嶽書史

又

此信過不得熙書想其書一一也小大佳不賓轉勝皆謝之賢妹大都勝前至不欲食篤羸恒令人憂餘

粗佳

法書要錄

又

昨得熙廿六日書云患氣懸情

淳化二十五〇二帖所云熙未必為重熙也

嘉賓帖

郝超字嘉賓

數親問叔穆嘉賓竝有問為慰

二郝帖

想彼人士平安二郝數

缺

也敬豫諸人近來停數日

悉佳安石已南遷其諸兄弟此改殊令蕭索聞君以

復入相府何時當應命未得坐處亦當愁罔思得為

鄰豈常情恐君方處務此命難期如之何不一小

佳復意問也

又

姊適復二告安和郝故病篤無復他治為消息耳憂之深今移至田舍就道家也事畢當吾遣信視淑還母子平安為慰至恨不得暫見故未得下船道夷書云已得一宅想今安穩耳不政解此移趨知鄩兒不快何所在今已佳也耿耿信白

荀侯帖

荀羨領兖州刺史鎮下邳討慕容蘭斬之即前書所云也

遠近清和士人平安荀侯定住下邳復遣軍下城此間民事愚智長歎乃亦無所隱如之何又須求雨以

復為災卿彼何似

並法書要錄

又

荀侯佳未果就卿深企懷耳安好音信明公還得歸洛也計今解有懸休尋

淳化九十八○明公還劉釋作那可遇好一作西



國家圖書館, NATIONAL CENTRAL LIBRARY, TAIWAN, R.O.C.

書目
卷四
六

書記洞詮卷第四十八

江東 梅鼎祚 纂輯

晉 十四

王羲之 三

謝仁祖帖

謝尚字仁祖
二王作還鎮帖

在我而已誠無所多云與謝豫州共入河不乃煩劇
得安萬送書云六日可至諸賢云朝廷失之轉覺闕
然與卿書同不有君子其能國乎此言深也但云卿
當人何以如夢恐卿表將復經年想仁祖差時還內
鎮慰人情耳皆在卿懷矣

續帖○二王帖首云得安
口矣書云云入作人○與

卿書旁
注四字

又

想官舍佳見護軍近書甚慰仁祖轉嘉然疾根不除尚令人憂復得問未復反書甚慰入月共至窟山看其橘思君宜深想鐵已還旦夕展也故復旨示義之報

又

忽然夏中感懷冷冷不適足下復何似耿耿吾故不佳得遠近問不虞生何當來遲一集昨見無爽十九日書二十六日西也云仁祖服石散一齊不覺佳酷

羸至可憂力知問王羲之書白

齊劑
通用

又

君頃復以何散懷鐵云秋當解褐行復分張想君比爾快為樂彥仁書云仁祖家欲至蕪湖單弱令俦何所成君書得載停郡迎喪甚事宜但異域之乖素已不可言何時可得發

並法書
要錄

安石帖

謝安

安石定目絕令人悵然一爾恐未卒有散理期諸處分猶未定憂縣益深念君馳情又遣從事發遣君無復坐理交疾患何以堪此何以堪此恐屬無所復厝

懷即乖大小不可言且憂君以疾他曳不易

萬石帖 謝萬

適萬石去月五日書為慰尋得彭祖送萬九日露版
再破賊有所獲想足摧寇越逸之勢宜適許司農書
為慰無人未能得重故向餘杭間

又

若治風教可弘今忠著於上義行於下雖古之逸士
亦將眷然況下此者觀頃舉厝君子之道盡矣今得
護軍還君屈以申時玄平頃命朝有君子曉然復謂
有容足地常如前者雖患九天不可階九地無所逃

何論於世路萬石僕雖不敏不能期之以道義豈苟
且若復以此進退直是利動之徒耳所不忍為 豈苟且有

二句末云
所不以為

又

昨暮得無奕阿萬此月二日書甚近清和耳羌賊故
在許下自當了也桓公未有行日阿萬定 缺 吳興 謝奕

字無
奕

又

產婦兒萬留之月盡遣甚慰心 並法書
要錄

又

向亦得万書委曲備悉使人慨然見足下乃悉知叔
虎剋昨發月半略必至未見勞參軍

淳化八十五
○悉一作半

又

三月十六日羲之白一昨省不悉雨快君可不萬石
轉差也灸得力不不得後問懸悒不知懷君云當有
旨信遲望其至僕劣劣故遣不具還具示王羲之

一百五十八○知一
作去具施作乙乙

謝光祿帖

謝光祿亦垂命可憂念念一朝奄忽傷人懷今年彫
落可哀歎

淳化六十一

二謝帖

二謝致喪興公近便索然玄度來數日有疾患便復
來阿萬小差阮公政耿耿懷祖可呼賀祭酒俱

又

得表二謝書具為慰表生暫至都已還未此生至到
之懷吾所盡也弟預須遇之大事得其書無已已二
謝云秋未必來計日遲望萬羸不知必俱不知弟往
別停幾日決其兵為樂也尋分旦與江姚女和別殊

當不可言也

法書要錄○淳化四十
七吾所也止無盡字

謝生帖

得書知足下且欲顧何以不邪向與謝生書說欲
往知登停山停山非所辯故可共集謝生處登山可
他日耶王羲之白法書要錄

又

謝生多在山下不復見且得書疾惡冷耿耿想數知
問雖能還不能數可歎不審比出日集聚不一爾緬
然恐東旋未期諸情罔罔淳化一百三十九〇七卷
合長風為一帖能一作得

又

上流近問不竟何日即路知謝定出居內所弘故重
又

王逸少頓首謝七日登秦望可俱行當早也

並法書要錄

又先期帖

知欲東先期共至謝欲處云何欲行想忘耳過此如

命淳化二〇
云一作之

又

謝書云云今送書史

謝司馬帖

十一月廿七日羲之報得十四十八日二書知問為
慰寒切比各佳不念憂勞久懸情吾食至少劣劣力
因謝司馬書不具羲之報淳化七十二〇切一
作切具施作乙乙

言言評語 卷四
玄度帖

許詢字玄度

君昨示欲見穆生叙讚今欲默語興廢之格粗當書爾不玄度好佳君謂何似

又

知玄度在彼善悉也無由見之此何可言

又

見君小大佳不過此乃知熙佳覺少不得同萬恨萬恨云出便當西念遠別何可云遲見玄度今或以在

道

又一帖君大小佳不至此乃知熙往

又

未得安西問玄度忽腫至可憂慮得其昨書云小差

然疾候自恐難耶

一云然後自恐難耶○米云史稱玄度服巨勝實莫知所終此可鑒也

又

玄度先乃可耳嘗謂有理因祠祀絕多感其夜便至此致之生而速之每尋痛惋不能已已省君書增酸恐大分自不可移時至不可以智力救如此

又

服食故不可乃將冷藥僕卽復是中之者腸胃中一冷不可如何是以要春秋輒大起多腹中不調適君

宜深以爲意省君書亦比得之物養之妙豈復容言直無其人耳許君見驗何煩多云矣

又

痛念玄度立如志而更速禍可惋可痛省君書亦增

酸並法書要錄○此三書言玄度以服食致亾

又西問帖

得西問無他想彼人甚平安此粗佳玄度來數日爲

慰淳化一百二十一

又

不得西問耿耿淳化一百三十七

許君帖

知念許君與足下意政同但今非致言地甚勅勅亦

不知范生以居職未以卿示輒便及之吾尚不能惜

小節目但一開無解已又亦終無能爲益適足爲煩

瀆足下呼尔不淳化六十五○許君非必玄度也政當作正蓋逸少祖尚書郎名正故正

月或作初月或作一月他正字皆以政代之

論諸葛昏書

二族舊對故欲結援諸葛若以家窮自當供助昏事

又云欲速知決東觀餘論○黃伯思跋云案晉謝石嘗求昏諸葛恢稚女恢不許及恢亾

乃成昏於時王右軍往謝家看新婦猶有恢之遺則威儀端詳容服光整王歎曰我在遣女裁得尔耳始

言謂湘語 卷四
不知此何與逸少事而嗟賞若此及觀此帖乃
云云始知右軍為主茲事故觀謝婦發此歎也

諸葛亮帖

諸葛亮者君識之不才幹好佳往為錢塘著績又入
僕府有以盡悉宰民之至也甚欲自托於明德云臨
安春當缺爾者君能請不僕必欲言得佳長史亦當
是君所須既得里人共事異常故乃爾須還告之

續作田必欲
言作心至欲

弘遠帖

王粹字弘遠弘農
人以貴公子尚主

未復弘道近書見與弘遠書恐卿不得久坐何如休
稚玄佳不想數得足下旨令知問

又

見弘遠二書皆以達也動散即佳為慰

並法書
要錄

又

昨見君
歡帖

昨見君歡復無喻然未善悉想宿昔可耳脅中云何
一善消息值周轉勝也耿耿疾患小差與弘遠俱詣

遲共寫懷王羲之

淳化九十四
一作德詣一作臨又作謁

又

弘遠比當造頃遲見此子真以日為歲足下得審問

旨令吾

淳化九十七
釋作知非頃一作次

阮光祿帖

阮裕字思曠徵為金紫光祿大
夫義之嘗曰此公近不驚寵辱

九月二十八日羲之頓首頓首昨者書想至叅軍近有慰阮光祿信在耳許中郎家欲因書比去報知庾君遂不救疾摧切心情痛當奈何深當寬勉以不忘先心臨紙但有酸惻王羲之頓首

情下云不得自甚○法書要錄

又 以下凡云阮者並附

阮公故爾可憂時放恕大事今令速言何方守篤大矣不得力而從事以至其無計自必出惟須小佳鐵石今出求救足下可復助且令得通

焱黃諫作惡得作將求作取且作且

又

范公及阮公既并微旨足下謂合損益之宜不

又

知劉公差甚慰甚慰知前乃爾委頓追以怛然今轉平復也阮公近聞不萬轉差也

又

此鄙問無恙諸從皆佳此諸數耳知劉阮數

又

從事經過崔阮諸人昨日與書疾故示毒愁當增其疾吾如今尚劣劣又晚熱未有定發日有定示足下興耳近書或欲留吾甚欲與俱而吾疾患遲速無常

其竟云何足下今知問

並法書要錄

又

阮生何如此粗平安數問爲慰

淳化七十六

又

知阮生轉佳甚慰甚慰會稽近患下始差諸謝粗佳

又

向遣書想夜至得書知足下問當遠行諸懷何可言一十必早發想足下如向期也阮侯止於界上耳向書已具不復一一王羲之白

范公帖

范公書如此今示君須臾見故當勸果之告旨語君遲而不可言

范生帖

麥秋帖

大都夏冬自可足麥秋輒有違此亦人之常期等平安姜在此羸小差知諸賢佳數見范生亦得玄近書爲慰又得孔郝王書亦云不能數何爾須江生可耳斷絕也尚未見傅女足下言極是有懷甚佳

法書又帖云

大都夏冬自可可春秋輒有患此亦人之常期等平安善善此羸小差先生至其歡慰且卿一女而已

羊參軍帖

羊參軍還朝論長見敦恕其爲慶慰無物以喻今又

告誠先靈以文示足下感懷慟心

此似是右軍欲去會稽時帖告誠先

靈乃誓墓文也

又

書雖備至聚宜有以宣事情今遣羊參軍西諸懷所具必欲今觀想可思今得時面克今得還也

又

羊參軍尋至具一一子期諸人何似耿耿

曹參軍帖

想曹參軍疾者已往必能同來

參軍帖

近書至也得十八日書為慰雨蒸比各可不參軍轉差也懸耿吾胛痛劇灸不得力至患之不得書自力

數字 並法書要錄

又

月半念足下窮思深至不可居忍雨濕體氣各何如參軍得針灸力不甚懸情當深寬割情通省苦遣不

具王羲之白 淳化六十三〇情一作晴苦施作告

白牒帖

五月二十七日州民王羲之歿罪歿罪此夏復便半 缺 惟違離衆情兼至時增傷悼頃水雨未之有不審

尊體如何得疾除也不承近問馳企民自服椽屑下
斷體氣便自差強此物益人去陟釐劫樊遠也以爲
良方謹及因青州白牒不備義之歿罪歿罪

周參軍帖

義之歿罪歿罪近因周參軍白牒伏想必達此春以
過時速與深兼哀傷摧切割割心情奈何奈何須臾寒
食節不審尊體何如不承問以 經月馳企民疾根
治滯了無差候轉久憂深叔缺遣信自力粗白不宣
備義之歿罪歿罪並法書要錄

虞休意帖

卿與虞休意書有所問足下旨爲致誠答令旨意致
來勿忘此意自決今以資嚴知小大疾患念勞心淳化

三十九〇
與一作知

董祥帖

問董祥吾亦問之冀必來兵時得之甚佳頃日憤憤
不暇復此省示及乃復憶之耳

馮公帖

今與馮公論何產足下可思助明清談至是舉今又
語真道今宣旨矣

溫公帖

溫公在此前東北面還此復初缺散爲慰便乞良不可言卿得知之復共一快樂並法書要錄

周常侍帖

此書因周常侍想必至

淳化一百一十九

徐舍人帖

適州將十五日告徐一癰方尺許口四寸云數如來小如差然疾源如此憂怛尚深故遣信治徐舍人書以示徐還示足下也不堪縲疑事列上台周青州視事今以當至下耶甚是事宜無方身世而任事者疾患如此使人短氣法書要錄

徐侯帖

侍中書書徐侯遂危篤恐無復冀深令人反側

淳化四十二

朱博士帖

藥湯諸人佳也今知問朱博士何當還君可致意令速還想無稽留

王會稽帖

今與王會稽丘山陰書借人想故當有所得又語丘令臨葬必得耳

暨主簿帖

十二月六日羲之報一昨因暨主簿不悉昨得去月

十五日二十三日二書為慰兩書夜無解夜來復雪
弟各可也此日中冷患之始小佳力及不一一義之
報

劉生帖

得都近問清和為慰云劉生近欲舉君為山陰以中
當為最君期於未獲供養處相為慨然仕宦殆是想
也

二蔡帖

二蔡過莽來居此親親集事而君復出為因耳

江侯帖

賢室何如何可為心惟絕難與人理耳諸患猶爾憂
勞深似 江侯 足下遺臨愒次冷取書

江生帖

江生佳須大活以始見之與人上蕭索可歎

並法書要錄

張令帖

知賢室委頓何以使爾甚助耿耿念勞心知得廿四
問亦得叔虎廿二日書云新年乃得發安石昨必欲
尅潘家欲尅廿五日也足下以語張令未前所經由
足下近如似欲見今送

淳化八十七
以一作比

丘令帖

丘令送此宅圖云可得卅畝尔者為佳可與水丘共

行視佳者決便當取問其賈此帖舊與謝生東旋二帖合為一淳化一百

三十八○施釋注云劉釋作近今送此宅圖近字與下文詞意似舛而與水丘之丘字筆法正同當作丘彥遠帖錄云今與丘山陰書借人又語丘令臨葬借輕車竊意即此丘令也右軍宅在越之蕺山今為戒珠寺隸山陰庸非此宅圖耶○佳者劉釋作往告

何侯帖

去冬臨臨安事近便欲決去而何侯不許事聞以有小寇今未便得果然故有移南意尚未可倉卒復信更具信汝也

太常帖

太常故患胛灸俞體中可耳僕射事已行以表讓

未知恕不未復司州旨告懸竦鄱陽歲使應有書而

未得竦一作諫誤有書一合作膺○淳化八十四

司馬帖

小大佳不可得司馬問懸情適安以中軍出鎮有避賢意乃云行得言尚不知公私此理卒當之耶甚憂真本無集之者想今與君書一

又

不得司馬近問懸情近所送書即至也君信明早令得後得鄙書未至即想東不久耳

又

司馬雖篤疾久頃轉平除無他感動奄忽長逝痛毒之甚驚惋摧慟痛切五內當奈何奈何省書感哽

又

司馬疾篤不果西憂之深公私無所成

並法書要錄

又 安善帖

二月廿日羲之白

缺

不可言得六日告為慰寒想

各安善司馬與無還問耿耿僕可耳力不具王羲之

白

河東薛氏帖

中書帖

舍內佳不中書何似家中疾篤恒救旦夕比知覺有

省書想至

法書要錄

明府帖

前從洛至此未及就彼參承願夫子勿悒悒矣當日

緣明府共飲遂闕問願足下莫見責羲之頓首

淳化七上

一○黃云自初月二日至前從洛帖如羲之是也願知心素致使如然也願足下莫見責皆俗人偽作

長史帖

冷過足下夜得眠不祇差也復何治甚耿耿長史復

何似故問具示王羲之白

鎮軍帖

鎮軍昨至尚未見也尋見之悲欣不可言

義興帖

義興何似懸情慕容遂來據鄴可深憂官復遣軍可
以示義興中書

又

此雨足何耳故當收佳云彼甚快大事吳義興
是蕩然可歎

吳興帖

隔以久諸懷既不可言且今多慘戚遲君果前暫得
一散懷知以多疾不果乃當秋事省告同此歎恨如

何可言葬事不可倉卒當在九月初過此故欲一與
吳興集冀無不尅耳然事來萬端不知如人意不非
書能悉君數告以慰之耳

又

六月十六日羲之頓首秋節垂至痛悼傷惻兼情切
割奈何奈何此雨過得十日告知君如常吳興轉勝
甚慰想得此涼日佳患散乃委頓耿耿且以佳興消
息僕故是常耳劣劣解日力不次王羲之頓首

又

墳墓在臨川行欲改就吳中終是所歸中軍往以還

田一頃烏澤田二頃吳興想弟可還以與吾故示想
弟居意故如往言忠終高也是以思同之

並法書
要錄

永興帖

廿二日羲之報近得書即日又得永興書甚慰想在
道可耳吾疾故爾沈滯憂悴解日面近不具羲之報

淳化三
十五

臨川帖

不得臨川問懸心不可言子嵩之子來數有使冀因
得問示之

黃云非逸少書庾子嵩非同時
人庾數字子嵩○淳化四十六

上虞帖

足下欲同至上虞一宿還無所廢吾初至便與長史
俱行無不可不

又

小大皆佳也度有近問不得上虞甚佳足下當能相
就不思面卿前云當來何能果也遲散無喻吾後月
當出以省念示

潁陽帖

行政五十日不復得問懸情皆佳也何貽云得潁陽
書平安慰意不得吳諸人問懸遲之

鄱陽帖

言言清語 卷四十八
七月十三日告鄱陽兄弟大降制終去悔悼甚永絕
悲傷痛懷切割心情也並法書
要錄

東陽帖

近日
帖

近日東陽絕無常憂心何可言想足下當盡能致絳

○二王帖云此與敬和隔口不而
建中靖國續帖以為賀知章非

先生帖

先生適書亦小小不能佳大都可耳此書因謝常侍

信還令知問可令謝長史且消息

淳化可
耳止

又

先生頃可耳今日略至遲委垂知樂公可為之慰桃

膠易得可以少耶專一物不移乃不忠也充迎不致
意知陽意事迎願人之善

夫人帖

吾去日盡欲留女過吾去自當送之想可垂許一出
未知還期是以白意夫人涉道康和足下小大皆佳
度十五日必濟江故二日知問須信還知定當近道
迎足下也可令時還遲面以日為歲夫人當
別一帖

又

尊夫人向來復何如為何所患甚懸情念卿累息具

至義之敬問

並法書
要錄

又平康帖

夫人遂善平康也足下各可不翼行復面王羲之頓

首淳化二十四○黃云夫人及蔡家二帖亦後人依倣

又

旦極寒得示承夫人復小欬不善得眠助反側想小

爾復進何藥念足下猶悚息卿可不吾昨暮復大吐

小噉物便爾旦來可耳知足下念王羲之頓首淳化三十

八

又

尊夫人不和想小耳今以佳念累息卿佳不吾故劣

劣力知問王羲之敬問淳化一百四十七○米云偽

女聾帖

取卿女聾為長史休種知何似耿耿淳化一百五十一○顧氏法帖

釋文考異云知耳為聾字于祿字書聾聾壻上俗中通下正劉與施誤分聾為知耳兩字○種一作稚知何疑作不何

書記洞詮卷第四十九

江東 梅鼎祚 纂輯

晉 十五

王羲之

四〇此卷帖並言及王氏内外子姓亦非
與其人也延期官奴之屬晉人小字耳

司州帖

王胡之為
司州刺史

得司州書轉佳此慶慰可言云與君數數或採藥山
崖可願樂遙想而已云必欲尅餘杭之遲期此不可
言要須君旨問僕事中久宜暫東復令白便行還便
行當至剡槌上二十日後還以示政當與君前期會
耳遲此情兼二三

又

知諸賢往數見范生亦得其近書為慰又得孔生書亦云不能數何爾耶江生可耳斷絕冀涼集也得司州十六日書諸疾患至憂之至深矣有斷未想桓公數便亦知謝生大得情和至慰安以當至吳興遲見之也

並法書要錄

又

適大常司州鎮軍諸人廿五六書皆佳司州以為平復此慶慶可言餘親親皆佳大奴以還吳也冀或見之

淳化四十九○鎮施作領慶法書作之以還一作比還

又

司州供給寥落去無期也不果者公私之望無理或復是福得大等書慰心今因書也野數言疏平安定

太宰中郎

淳化五十○者一作去定作足

又

得書知問吾夜來腹痛不堪見卿甚恨想行復來脩齡來經日今在上虞月末當去重熙旦便西與別不可言不知安所在未審時意云何甚令人耿耿

胡之字脩

齡○淳化一百二十八

敬豫帖

王恬字敬豫導子義之從弟

上下安也和緒過見之欣然敬豫乃成委頓令人深
憂江生亦連病今已差淳化載敬
豫十字

敬和帖 王洽字敬
和導子

上下無恙從妹佳也得敬和近問不人有至憂其疾
者令人深憂隔久何日能來

又

敬和在彼尚來議還增耿耿

敬祖帖 王協字敬
祖導子

比見敬祖小大可耳念孫阮諸人皆何似耿耿

敬親帖

敬親今在剡其後復亾甚不可言

穰鐵不知已得一行
短書

敬倫帖 王劭字敬
倫導子

九月三日羲之報敬倫遮諸人去晦祥禫情以酸割念
卿傷切諸人豈可堪處奈何奈何及書不既羲之批

又

十九日羲之報近書反至也得八日書知吳故羸敬
倫動氣發耿耿想得冷此為佳也敬文佳不一一羲

之報 王薈字敬
文導子

延期帖

汝當須過殯還恒有悲惻王延期省

又

七日告期痛念玄度未能缺心汝臨哭悲慟何可言
言及惋塞夜缺市器俱不合用令摧之也吾平平但
昨來念玄度體中便不堪之耶

又

十一月十三日告期等得所高餘姚并吳興二十八
日二疏知竝平安慰吾平平比服寒食酒如似為佳
力因王會稽不一一阿耶告知

又

兄弟上下遠至此慰不可言嫂不和憂懷深期等殊
勿勿焦心

又

期小女四歲暴疾不救哀愍痛心奈何奈何吾衰老
情之所寄惟在此等失此女痛之纏心不能已已可
復如何臨紙情酸並法書要錄

又

期已至遲還具足下問耳當力東論道家無緣省苦
但有悲慨不得東此月問淳化八十九〇論一作詣
苦施作告米云當以下偽

又

義之歿罪小大悉以來未惶不可懷未復諮誨問懸
情計賓命行應至遲卞公還具承問妹極得散力以
爲至慰期等故爾耳因緣不多白義之歿罪

淳化一百一十二

又

得書知足下問吾旣不佳賢內妹未差延期

淳化一百二十六

官奴帖

延期官奴小女竝得暴疾遂至不救愍痛心奈何吾
以西夕至情所寄惟在此等以禁慰餘年何意旬日
之中二孫天命日夕左右事在心目痛之纏心無復
一至於此可復如何臨紙咽塞

法書要錄

又

延期官奴小女病疾不救痛愍貫心吾以西夕情願
所種惟在此等豈圖十日之中二孫天命惋傷之甚
未能喻心可復如何

又

義之頓首二孫女夭傷悼痛切心豈意一旬之中二
孫至此傷惋之甚不能已已可復如何義之頓首

又

官舍佳也節氣不適可憂彼云何昨得義書比佳甚
慰甚慰得官奴晉寧書賓平安念懸心此粗佳一日

書此一一

並法書要錄

又

數有想常逢還此不快鄙人得夏常爾公為爾差念足下小大佳憂卿可耳想同數得問官奴婦產復委篤憂之深餘粗可耳知足下念差免憂之不具義之白

淳熙續帖○米云今絳帖亦有一帖語多同而前後參錯

穆松帖

伏想媿安和自下悉佳松上下至乖隔十八年復得一集且悲且慰何指喻媿疾至篤憂懷甚深穆松難為情地自慰猶小差然故忽忽冀得涼漸和耳

指一作物

慰一作至和一作利○淳化十二

又

日月如馳媿棄背再周去月穆松大祥奉瞻廓然永惟悲摧情如切割汝亦增慕省疏酸感

淳化七

又

六月二十七日羲之報周嫂棄背再周忌日大服終此晦感摧傷悼兼情切劇不能自勝奈何奈何穆松垂祥除不可居處言以酸切及領軍信書不次羲之報

又

言淵語 卷四十九
七月十六日羲之報凶禍累仍周嫂棄背大賢不救
哀痛兼傷切割心情奈何奈何遣書感塞羲之報

又

君大小佳不松廬善斲也僕信還秦州將去月十二
日告甚慰如曹失護語此君甚康壯常是肥渴耳實
尋還遲之不可言二妹差佳慰問心期中冷頃時行
可畏愁人

又

上下近問慰馳情不知何似絕不得松問汝得旨問
馳白宜豫知分春事也吾日東可語期令知消息

遮何日西帖

官舍佳也得諸舍問不不知遮何日西言及辛酸卿
不可懷期等故勿憂勿憂深

又

庾雖篤疾謂必得治力豈圖凶問奄至痛惋情深半
年之中禍毒至此尋念相摧不能已已況弟情何可
任遮等荼毒備盡當可忍視言之酸心奈何奈何

農敬親帖

農敬親同日至至數日耳道路平安爲慰妹且停爲
大慶懷元

又

若來大小祥當復出者殊更良昌若汝不出農當單出汝能遣農速行不諸宜皆當自詳計審日遲望而更未定殊更悵恨不可言

又

此乃爲汝求宅謂汝來居止理軍千何可久處而情事不得從意可歎可歎終果來居者故當爲汝求也以書示農

告姜帖

六日告姜復內始晴快情汝母子平安

又

二十七日告姜汝母子佳不力不一一耶告

阿刁帖

阿刁近來到下上下下皆佳姜夫數白

迎慶帖

上下可耳產行往當迎慶思之不可言

和方帖

羣從彫落將盡餘年幾何而禍痛至此舉目摧喪不能自喻且和方左右時務公私所賴一旦長逝相爲痛惜豈惟骨肉之情言及摧惋永往奈何表妹委篤

示致問荒憤不得此熱不能不取給腹中便復惡無賴

道冲帖

羣從書皆佳道冲書平安汝當改葬不可云勞冲遇

此事或復連留

並法書要錄

豹奴帖

羲之頓首昨得書問所疾尚綴綴既不能眠食深憂慮懸吾情至不能不委嬾故不差豹奴晚不歸家隨彼弟向州也前書云至三月間到之何能盡情憂足下所惠極爲慰也不謂也

建中靖國帖

野大帖

野大皆當以至不得還問懸心大得善悉也野當不能遏卿竝轉茂清談

又

想諸舍人小大皆佳弟摧之可爲心且得集目下此慰多矣姊累告安和梅妹大都可行表妹極得石散力然故不善佳疾久尚憂之想野久恙至善分張諸懷可云不知其期何時可果永嘉競逐者有力恐難

冀得大柿當種之

並法書要錄

又

吾惟辨辨便知無復日也諸懷不可言知彼人已還
吾此猶有小小往來不欲來者其野近當往就之耳
不大思其方不見可久理而任之者悠然此可歎息

淳化一
百二十

道護帖

六月十一日羲之報道護不救疾惻怛傷懷念弟聞
問悲傷不可勝奈何奈何曹妹累喪兒女不可爲心
如何得二十三日書爲慰及還不次王羲之報

賓諸人帖

賓諸人佳不皆致心憶之不忘懷

又

賓如人往不堪致心憶之不忘懷之

又

想大小皆佳知賓猶伏爾耿耿想得夏節佳也念君
勞心賢姊大都轉差然以故有時嘔食不已是老年
衰疾更亦非可倉卒大都轉差爲慰以大近不復服
散當將陟釐也此藥爲益如君告

淳化云至足
言年衰疾久

知定帖

省書知定疑來汝君長膈所養雖小要爲喪王劉夫
人靈坐在堂政爾遠來于禮誠不可違所以狼狽遠

迎汝情地信難忍交恐有性念慮得來想慰釋實引
是以下復思此耳若汝能割遣無益得過喪制遂來
居此乃事宜也若自量不能違哀念須吳等旦夕相
喻者當來汝當自若吳意盡此也

又

適都十五日問清和傳賦問定寂寂當是虛也然始
興郡奴屯結不肯出恐成令人邑邑想官吏長制之

耳

並法書
要錄

又

定聽他母子哀此遂不還可令未也

淳化五
十六

又

不審定何日當北遇信復白遲承後問

淳化一
百十二

華直帖

僕近脩小園子殊佳致果雜藥深可致懷也儻因行
往希見比二處動靜故之常患馳情散騎癰轉利慶
慰姊故諸惡反側永嘉至奉集欣熹無喻餘可耳得
華直疏故爾諸惡不差懸憂順何似未復慶等近消
息懸心君竝何爲耶此猶未得盡集理行大尅遲此

無喻

淳化一百四〇米云偽帖伯思云僕近修小園

子殊佳帖米以爲子敬書僕謂處動靜以下方
是子敬筆前兩行乃唐人書字勢帖語與後迥殊大
觀釋注云淳化本作慰大觀本作至未知孰是下有

永嘉至字與慶至字寫法一同後又有慶等近消息此帖元章長睿皆謂非右軍帖乃子敬所作元章藏子敬十二月帖勒石寶晉齋亦有慶等字筆法正相類當是人名爾

華母子帖

知諸患耿耿今差也華母子佳

又

不得東陽問想卿婦遂平復耳聾佳不謝之幼小頃可行華母子平安知足下故望暫還歲內何理過歲必有理不思存足下復得一叙平生當可言得卿書尋省反復但有悲慨比者且當數致年知

缺

念奴帖

妹轉佳慶不及啼不憶念奴殊不可言涼當迎之

二奴帖

與安石俱佳還七日增想投命積日不復知問弟佳寧善然復憂之不去懷吾遂沈滯兼下如近數日分無復理昨來增服陟厘丸得下不知遂斷不了無所噉而藥得停不知當復見弟理不獨下便長歎小蘇息更知問二奴庶諸人何以謝之

貴奴帖

貴奴差不想不成大病傷寒可畏令人憂當盡消息地

阮兒帖

適阮兒書其氣散暴處便危篤憂之怛怛

靜婢帖

此上下可耳出外解小分張也須產往迎慶思之不可言知靜婢面猶爾甚懸心

又

知靜婢猶未佳懸心可小須留爾

並法書要錄

遠嘉興帖

得遠嘉興書計今日必度喜遲可言足下至慰今有書想足下有旨信別告具之

淳化七十八
○遠一作還

又遠婦帖

遠婦疾猶爾其餘可耳今取書付想具

淳化七十五

鵲等帖

鵲等不佳令人弊見此輩吾衰老不復堪此

見米芾書史

濮州直祕閣李孝廣叔右軍十餘帖字老而逸暮年書也略記其數帖

彥仁帖

此與下並名服食帖

服食而在人間此速弊分明且轉衰老政可知乃欲與彥仁集界上甚佳諸如此事皆所欣也平自可耳何所諮人外將何必拘小繩墨且令吳興不出界當可耳便因餘杭而行耶不自此會再舉難也君便可

以僕書示之但俗多恠且在草澤者為爾扇動縱任

恐惡之者眾

河東薛氏○米芾書史載一帖云欲與
彦仁集界上平自可且何所諮人乃王

道平

又

彦仁數問也脩載暫來忻慰

法書
要錄

脩載帖

小佳更致問一一適脩載書平安

淳化
三十

伯熊帖

伯熊上下安和為慰可令知問叔夷子前恨不見可

令熊知消息

法書
要錄

又

羲之白奉告慰反側伏想比安和伯熊過見之悲酸

大都可耳惟垂心羲之平平一日白比具

淳化三十一

又

羲之頓首向又慘慘自舉哀乏氣勿勿知便當西且

不相知來想熊能更言問力遣不次王羲之頓首

長素帖

羲之白霧氣足下各何如長素轉佳甚耿耿

又

晴快足下各佳不長素轉佳也甚耿耿故知問具示

王羲之白

並法書要錄

又

長素差不懸耿小大佳也得敬豫九日問故進退憂之深

淳化六十四

子卿帖

羲之歿罪見子卿具一一荒民惠懷最要也甚以欣慰惟願不倦爲善承留此生當廣陵任佳此生處事以驗海陵江

缺

間殊令人有懷也羲之歿罪歿罪

又

十一月七日羲之報近因子卿書想行至霜寒弟可

不頃日了不得食至爲虛劣力及數字羲之報

道長帖

知道長不孤得散力疾重而邇進退甚令人憂念遲信還知問

道祖帖

道祖滯下乃危篤憂怛憂怛

陽主帖

十五日羲之報近甚倉卒得十三日音知卿佳慰之力及陽主書不一一羲之報

茂善帖

九月十八日羲之頓首茂善晚生兒不育痛之惻心
奈何奈何轉寒足下不可不不得問多日懸情吾
故劣力不具王羲之頓首

君遠帖

君遠在此乃受恩來今留之明晚共親親集想君未
便至餘姚爾

祖伯帖

知足下數祖伯諸人問助慰絕不得兄子問懸念可
言此於南北

缺

郎子帖

信所懷願告其中并爾郎子意同異復云何邈然無
諮叙之期每賜翰墨使如暫展羲之次罪

陽化帖

頃猶小差欲極遊目之娛而吏卒守之可歎耳陽化
果似小可何日得卿諸人

元道帖

想元道弘廣平安道充當得還不

德孝帖

知德孝故平平想當轉得散力每耿耿不忘懷足下

小大佳不

並法書
要錄

熙孝帖

又不能不痛熙孝亾政爾復何於求之度政當求之內事餘理不絕求之一條當有冀不信罔然前途願乙乙誨之以悟其心此後有疾不退一段淳化作獻之轉勝帖孝施作存乙乙施

作具○淳化十九

長翔帖

信使甚數而無還者似書疏不可得得問宜示告之知長翔田舍比卿還當知何候須得音副民望甚善

長高帖

長高當覽還耶並法書要錄

長風帖

每念長風不可居忍昨得其書既毀頓又復壯温深

可憂淳化十六

長平帖

得告承長平未佳善得適適君如常也知有患苦耿耿念勞心食少勞甚頓還白不具王羲之再拜淳化八

君服帖

君服前賢弟逝沒一旦奄至痛當奈何當復奈何臨紙咽塞王羲之頓首頓首

源書帖

源書以發吾欲路次見之亦不欲停甚

又

源遂差不云尚未恭命終之何聞真長知吳興想必如意南道差不

又

足下各可不都五日書今送謝即至想源得免豺狼

耳王羲之

並法書要錄

又

源日有書徑此果中而值吾病不得見之萬恨萬恨似從負浦不知何日當進足下必得見之也

淳熙續帖

尚書中郎帖

知尚書中郎差為慰不得吳興問懸心數吳中聞耳小奴在此忽患瘡比數發今日最為大都輕瘡耳尚小停今在吾廐中念猶懸心小患耳無所垂心須佳乃去

又

尚書中郎諸人皆佳比面雖近隔殊思卿度還旦夕

又

小大佳也不得尚書中書問耿耿得業書慰之

又

亦得業書為慰今付還安方決去不言言即卿書致

建安帖

四月五日羲之報建安靈柩至慈蔭幽絕垂卅年永
惟崩慕痛徹五內永酷奈何無由言告臨紙摧哽羲
之報

又

淳化慈顏下
別為一帖

兄靈柩垂至永惟崩慕痛貫心齋痛當奈何計慈顏
幽翳十三年而吾匆匆不知堪臨始終不發言哽絕
當復奈何吾頃至劣劣比加下昨

十三淳化作垂卅
吾頃至匆匆比加下

省弟帖

前使還有書哀猥不能叙懷情痛兼哀若割當奈何
奈何省弟累紙哀毒之極但報書難為心懷况卿處
之何可具恐有始有卒自古而然雖當時不能無情
痛理有大斷豈可以之致弊何由寫心絕筆猥咽不
知何言也

又

十一月五日羲之報適為不吾悉不適弟各佳不吾
至勿勿力數羲之報

又

知弟不果行吾不佳面近也

並法書
要錄

又

近因得里人書想至知故面腫耿耿今差不吾比日
食意如差而髀中故不差以此為至患至不可勞力
數字令弟知聞耳

淳化五十一〇要錄面腫
下無耿耿二字髀一作髀

又

想弟必有過理得暫寫懷若此不果後期欲難冀臨
書多歎吾不復堪事比成此書便大頓

淳化五十三
〇後劉作復

一作
役

兄子帖

兄子發尚未有定日當送至瀾遠乖不可復言

又

三日先疏未得去得四日疏為慰兄書已具不復一

一

賢姊帖

妹附

賢姊體中勝常想不憂也白屋之人復得遷轉極佳
未委幾人吾齟痛所作讚又恐不任當示般也

帖

河東
薛氏

又

劉氏平安也梅妹可得袁妹腰痛冀當小爾耳汝母
故若以不安食疾久憂憤當思平理也神意不同前

者也

又

袁妹當來悲慰不言下家當慰意令知之

又

武妹小大佳也

又

得告慰為妹下斷以為至慶吾比日至未果殊有邑想王羲之頓首

又

妹不快憂勞餘平安

並法書要錄

又

家月末當至上虞妹亦俱去

淳化一百三十五

亾嫂帖

頓首頓首亾嫂居長情所鍾奉始獲奉集冀遂至誠展其情願何圖至此未盈數旬奄見背棄情至乖喪莫此之甚追尋酷恨悲惋深至痛切心肝當奈何奈何兄子荼毒備嬰不可忍見發言痛心奈何奈何王羲之頓首頓首

庾新婦帖

庾新婦入門未幾豈圖奄至此禍情願不遂緬然永

絕痛之深至情不能已況汝豈可勝任奈何無何無由叙哀悲酸

郝新婦帖

李母猶小小不和馳情伏想行平康郝新婦大都小

差卿大小佳

並法書要錄

中郎女帖

中郎女頗有所向不今時婚對自不可復得僕德意

君頗冷不大都此亦當在君耶

淳化一百二十一
冷一作淪

姨母帖

十一月十三日羲之頓首頓首頃邁姨母哀哀痛摧

剝情不自勝奈何奈何因反慘塞不次王羲之頓首

頓首

寶章集

又

書末云得諸爲慰知汝姨欲西情事難處然今時諸不易得東安書甚不欲令汝姨出懇至想自思之

李氏甥帖

十二日告李氏甥得六日書爲吾劣劣力不一一羲之白

雜帖

以下俱稱汝是與其卑行也

汝宜速下不可稽留計日遲望今日亦語劉長史令

速

又

去冬遣使想久至乖離忽四年言之歎慨豈言所喻
悠悠數十卒當何期汝等將慎為上知復何云

又

汝尚小愁思兼至不可居處多疾足下前許歲未今
暫還想必可爾故復白

又

行近遣書想即至此雨汝佳不得懸心吾乏劣力數
字

又

知汝表出便去不得見汝此何可言想秋必還恐此
書不復及汝不一並法書要錄

又

比奉對對兄以釋豈一淳化四

又屏風帖

汝不可言未知集聚日但有慨歎各慎護前與媿試
求屏風遂不得答為也淳化五

又

知彼乃爾切切汝乃獨坐但有憂邑懸遠不能得遣

人且吾無復久意果去當南視汝等也 淳化一百四十四

又

兒故未至不知何父知足下念 法書要錄



國家圖書館, NATIONAL CENTRAL LIBRARY, TAIWAN, R.O.C.

書記洞詮卷第五十

江東 梅鼎祚 纂輯

晉 十六

王羲之

五〇趙德麟侯鯖錄云閣下法帖淳化中
所集其中多弔喪問病此見刊誤乃唐國
子祭酒李涪所撰短啓出於晉宋兵革之間時
國禁書疏非弔喪問病不得輒行尺牘羲之書
首云死罪是違制令故也沈括筆談云晉宋人
墨跡多是弔喪問疾書簡唐正觀中按求前世
墨跡甚嚴非弔喪問病皆入內府士大夫家所
存皆當日朝廷所不取者所以流傳至今今右
軍諸帖凡為問慰而無
各氏可附者合此二卷

問慰諸帖 上

婦安和婦故羸疾憂之焦心餘亦諸患

又

卒喜慰氣滿無他治噉數合米來三日

又

明或就卿圍碁邑散今雨寒未可以治謝

江表付還

四字一行

又

得書知足下問吾骯髂上下黨夏腰骨拘

缺

痛俛仰

欲不得此何理耶願輒與相見無盡治宜足下得益使之不疑也但月又未陰沈沈恐不可針不知何以教目前甚憂悴王羲之

又

比信尋知足下有書可道知足下未能得果望近爲然知得家問賢子動疾念甚憂慮懸得後問不分張何可久幼小故疾患無賴

又

山下多日不得復意問一昨晚還未得遣書得告知中冷不解更壯温甚耿耿服何藥耶僕此日差勝尋知問王羲之頓首

又

念足下窮思兼至不可居處雨氣無已卿復何似耿

書言滌說 卷五十一
耿善將息吾故劣力知問王羲之

又

若可得耳要當須吾自南但增感塞

又

未復知問晴快卿轉勝向平復也猶耿耿想上下無
恙力知問不具王羲之敬問

又

人理不可得都絕每至屬致使人多歎

又

足下差否甚耿耿喉中不復燥耳故知問具示王羲

之白

又

遂無雨候使人歎得諸孫書高田皆欲了

又

得書知足下患癘念卿無賴思見足下冀脫果力不
一一王羲之白

又

此賢懷所禮也向一一 謝二侯

三字一行

又

五月十四日羲之近反至也得七日書知足下故爾

言言滙註 卷五十一
耿耿善將息吾腫得此霖雨轉劇憂深力不一一義之

又

因緣示致問非書能悉想君行有肯信

又

又以表書示卿政當亦不

又

此段不見足下乃甚久遲而明行集冀得見卿

得申近不問

五字一行

謝侯

二字一行

又

十一月十八日羲之頓首頓首從弟子天沒孫女不
育哀痛兼傷不自勝奈何奈何王羲之頓首

又

十月十一日羲之敬問得且書知佳爲慰吾爲轉差力

不一一羲之敬問

汝帖云
二月

又

廿八日羲之白得昨告承飲動懸情想小爾耳還旨
不具王羲之再拜

絳帖小作
不音作白

又

一日不暫展至恨叱而不已便懷不果東至可恨思

書言淵說 卷五十一
叙想閒暇必顧也

又

適都使還諸書具一一須面具懷

又

八月二十四日羲之頓首 竟增哀感奈何奈何兩
足下可耳不得問 日懸心吾故劣劣王羲之頓首

又

時行皆遍事輕耳彼云何

又

復委篤恐無興理諸人書亦云爾也憂之怛怛得停

乃公私大計也

又

君頃以何永日憶去冬不可得知如何如何

又

近書及至也瞻望不遠而未期颯面如之何遲得問
也

謝侯數不在歎

此一行至
底皆缺

又

前知足下欲居此常喜遲知定不果悵恨未知見卿
期當數音問也

又

見此當何言但恐今婦必門首有出復有將來之弊耳此願盡珍御理

又

懷足下可謂禮之缺今以志心寄卿想必至到論之救命不暇此事於今為奢遠耳要是事其本心

又

雨寒卿各佳不諸患無賴力書不一一義之問

又

想官舍無恙吾必果二十日後乃往遲喜散恙比爾

自相聞也

又

九月二十五日義之頓首便涉冬日時速感歎兼哀傷切不能自勝奈何得七月末時書為慰始欲寒足下常疾比何似每耿耿吾故不平復憂悴力困不一一王羲之頓首

又

七月五日義之頓首昨便斷草莽送期近痛傷情深奈何奈何得去月二十八日告具問慰懷力還不次王羲之頓首

又

羲之歿罪去冬在東鄧因還使白牋伏想至自頃公私無信便故不復承動靜至於詠德之深無日有隧省告可謂眷顧之至尋翫三四但有悲慨民年以酉夕而衰疾日甚自恐無暫展語平生理也以此忘情將無其人何以復言惟願珍重爲國爲家時垂告慰絕筆情塞羲之歿罪

又

宿息想足下安書吾猶不勝能佳一十早往遲王羲之頓首

又

羲之白不復面有勞得示足下佳爲慰吾却遽又睡甚勿勿力不具王羲之白

又

六月十九日羲之白使還得八日書知不佳爾何耿耿僕日弊而得此熱勿勿解日耳力遣不具王羲之白

又

十二月一日羲之白昨得還書知極不加疾人甚憂耿耿消息比佳耳吾至乏劣爲爾日日力不一一羲

之報

又

想明日可謝諸子

又

十四日羲之白近反不悉缺兩足下佳不不得近問

問無殊不佳頓劣因不一一羲之白

又

羲之頓首何貺知意至諸君皆困乏常想無之何緣作此煩損今付還王羲之何荷通用

又

一日多恨知足下散動耿耿護護吾至不佳劣劣不

一一王羲之頓首

又

初月一日羲之白忽然改年新故之際致歎至深君亦同懷近過得告故云腹痛懸情灾雨比復何似氣力能勝不僕為耳力不一一王羲之

又

旦書至也得示為慰云小大多患念勞心遲見足下未果為結力不一一王羲之白

又

書言派記 卷五十一
知書有去縣奔去誠意義官至也有禮制恐不必果
耶且君在彼縣常以爲得意宜思之耶意至故示

又

適欲遣書會得足下示

又

二十三日羲之報一日得書皆在計書所不得有反
轉熱卿各佳不定何可得來遲面不一一王羲之報

計書所一
作計所

又

冀行面遣知問王羲之白

又

十二月廿四日羲之報歲盡感歎得十二日書爲慰
大寒比可不吾故羸乏力不一一王羲之報

又

吾至今目欲不復見字

又初月
帖

初月十二日羲之累書至得去月二十六日書爲慰
比可不僕下連連不斷無所一欲噉輒不化消諸弊
甚不知何以救之罔極然及不一一羲之白

又

書言淵源 卷五十一
昨近有書至此故不多也遲書不悉耳

又

此言不可乏得知足下問吾忽忽力數字

又

足下知消息今故遣問使至具示之力書不一一王
羲之白

又

民以頃情事不可不懃思自補節勤以食噉爲意乃
勝前者而氣力所堪不如自喪初不哭不能不有時
惻愴然便非所堪哀事損人故最深益知不可不豁

之

又

吾涉冬節便覺風動日日增甚至去月十日便至委
篤事事如去春但爲輕微耳尋得小差固爾不能轉
勝沈滯進退體氣肌肉便大損憂懷甚深今尚得坐
起神意爲復可耳直疾不除晝夜無復聊賴不知當
缺得甞有間還得缺其寫不如今忽忽日前耳手亦
惡欲不得書示令足下知問

又

七月十五日羲之白秋日感懷深得五日告甚慰晚

書言評語 卷五十一
熱盛君比可不遲復後問僕平平力及不一一王羲之白

又

知君患隱何以及爾是爲疲之極也一知此事恐不可以不絕骨肉之愛無論人事也乃甚憂君若自量過歎患不以輕心者一事不爾當何理

又

不得君家書疏多往來皆平安耳今年此夏節氣至惡當令人危幼小疾苦故爾憂勞不可言

又

七月二十一日羲之白昨十七日告爲慰極有秋氣君比可耳力及不一一王羲之頓首

又

得九日問亦云鄙平平想得涼轉勝以疾乃服法必解此意

又

來月必欲就到家而得其問云尚多溪毒當復小却耳僕故有至臨川意尚未定自更有果南行者還乃得至壽春耳

又

書言評語 卷五十一
得都九日問無他

又

得反又獲示知足下發動脅腫卿此疾苦甚似期一
一想消一當轉佳爲何治也吾爲亦劣大都復是平
平隔耳許日前後有其效何喻冀涼日晚散耳尋復
知問王羲之

又

羲之頓首賢女殯歛永畢情以傷惋不能已已兄足
下愍悴深至何可爲心奈何奈何不能無時之痛憂
卿便深今何如患深達旣往吾志勿勿力知問臨書

惻惻王羲之頓首

又

書想至陰寒想自勝常

又

足下行穰久人還竟應快不大都當任縣量宜其令

闕

因便任耳立俟王羲之白

又

十九日羲之頓首明二旬增感切奈何奈何得十二
日書知佳爲慰僕左邊大劇且食少至虛乏力不一
一王羲之頓首

又

羲之歿罪累白想至雨快想比安和遲復承問下官劣劣日前可力白不具王羲之歿罪

又

及以令弟食後來想必如期果之小晚恐不展也故復旨示羲之報

又

甲夜羲之頓首向遂大醉乃不憶與足下別時向至道家乃解尋憶乖離其爲歎恨言何能喻聚散人理之常亦復何云惟願足下保愛爲上以俟後期故旨

遣此信取足下過江問臨紙情塞王羲之頓首

又

足下識先日之言信信具

又

馳情帖

數上下問如常何可得集耶念馳情未異果爲結念致問

又

畢力果思遲言面不可復得此與范期後月五日遂乃尅耳還遣旨進

又

鄙疾進退憂之甚深使自表求解職時以許乃當是公私大計然此舉不深又不宜是之於始二三無所成可以示從女其劣欲知消息

又

此雨過將爲受想彼不必同苗稼好也

又

吾頃曾中惡不欲食積日勿勿五六日來小差尚甚虛劣且風大動舉體急痛何耶賴力及足下家信不能悉王羲之

十月五日羲之忽有感情兼深足下得不可至前得

足下似行一書爲慰故不適足下昨還如常耳雖不得旨問遠得足下書輒具問爲慰吾頃曾中惡不欲食積日勿勿五日來小差七日羲之白

淳熙續帖後同要錄

又

思率府朝得書知問足下差但尚頓極之不一一

又

初月一日羲之報忽然改年感思兼傷不能自勝奈何奈何異更寒諸疾此復何似不得問多日懸心不可言吾猶小差甚尚劣力遣不知羲之報

又

卿各何罪似先羸而處至痛憂涕深重得之思寬遣
吾竝乏劣自力不報息

又

十月十五日羲之頓首月半哀傷切心奈何奈何不
可居忍得十三日書知問此何以恒耿耿吾至勿勿
小佳更致問王羲之頓首

又

羲之白乖違積年每惟乖苦痛切心肝惟同此情當
可居處羲之脚不踐地十五年無由奉展比欲奉迎
不審能垂降不豫惟哽 故先承問羲之再拜

又

圍碁帖

再昔來熱如小有覺然晝故難堪知足下患之云故
以圍碁是不爲患吾其爾無佳自得此熱憔悴終日
未果如何王羲之頓首

又

寒伏想安和小大悉佳奉展乃具

又

羲之頓首涼君可不女差不耿耿想比能果力不王
羲之頓首頓首

又

十二月十日羲之白近復追付期想先後皆至昨得
二十七日告知君故乏劣腹痛甚懸情災雨比日復
何似善消息遲後問復平平不一一王羲之白

又

知尋遣家信遲具問

又

向遣書想夜至得書知足下問當遠行諸懷何可言
十一必早發想至足下如向期也

又

十二月
月帖

十二月二十二日羲之白節近感歎情深得去月二

十三日書知君故苦日耿耿善護之往不僕得大寒
疾不堪甚力還不具王羲之白

又

適書至也知足下明還行復尅向王羲之白

又

小大佳也賢兄如猶當小佳然下不斷尚憂之

又

羲之頓首白雨無已不見猶小差力不一一王羲之
頓首

又

此公立德由來而嬰斯疾每以惋慨常冀積善之慶
當獲潛佑契同昔人尋憶 事緬然永絕哀惋深至
未能喻心省足下書固不可言已矣可復奈何絕筆
流涕

又

足下各可耳復雨可厭若吾所噉日去不復辭此意
想足下明必顧之遲散羲之頓首

又

羲之歿罪累白至也辱十四日告慰情念轉塞想善
平和下官至匆匆自力白

又

羲之死罪諸人何似耿耿

又

遣令使白恐不時至耳

又

月十三日羲之頓首追傷切割心不能自勝奈何奈
何昨反想至向來快雨想君佳方得此雨爲佳深爲
欣喜信旣乏劣又頭痛甚無疾力不具王羲之頓首

又

羲之頓首想創轉差僕其爾未欲佳憂憤力知問王

言言言言
卷五十一
義之頓首

又

三月十三日義之頓首近反亦至念足下哀悼之至不可勝更寒外足下何如吾劣劣力遣知問王羲之頓首

又

義之白一日殊不叙濶懷得書知足下咳劇甚耿耿護之冀以散力不一王羲之白

又

書成得十一日疏甚慰三舍動靜馳情先書已具不

得一一

又

諸患者復何如懸心比疏已具不復一一

又

書勿勿未得遣信又不知足下問吾既不快弱小疾苦甚無賴損尚小停有定去日更與足下相聞還不具王羲之白

又

適書至也此人須當令溼想足下可爲停之故示王羲之頓首

又

六月三日羲之白徂暑此歲已半載慨深可得二十七日書知足下安頃耿耿愁增患耶善消息吾至勿勿常恐一夏不可過不一一王羲之白

又

旦奉祠感思悲慟得書知問吾之劣力不一一王羲之問

又

王逸少頓首敬謝各可不欲小集想集後能果

又

足下晚各何以恒灼灼吾坦之欲不復堪事然力不一一王羲之頓首

又

足下各復何以恒灼灼故問王羲之白

又

羲之頓首君可不語差也耿耿力知問王羲之頓首

又 食穀帖

累書想至君比各可不僕近下數日勿勿腫劇數爾進退憂之轉深亦不知當復何治下由食穀也自食穀小有肌肉氣力不勝更生餘患去月盡來停穀噉

書言評語 卷五十一
麴復平平耳 並法書
要錄



國家圖書館, NATIONAL CENTRAL LIBRARY, TAIWAN, R.O.C.

書記洞詮卷第五十一

江東 梅鼎祚 纂輯

晉 十七

王羲之 六

問慰諸帖 下

適得書知足下問吾欲中治甚憤憤向宅上靜佳眠

都不知足下來一甚無意恨不斲面王羲之 淳化一

自適得書至慰馳竦耳惟穆松秋中二帖差似逸少
書餘並偽作又宅上靜眠過此如命等乃今流俗語

又

差涼君可不今日寔顧不遲面力知問王羲之 淳化三

國家圖書館 NATIONAL CENTRAL LIBRARY, TAIWAN, R.O.C.

又

奄至此禍情願不遂緬然永絕痛之深至情不能已
況汝豈可勝任奈何奈何無由叙哀悲酸淳化六

又

此諸賢粗可時見省甚為簡濶遠須異多小患而吾
疾篤不得數為歎耳淳化十四

又

秋中感懷雨冷冀足下各可耳胛風遂欲成患甚憂
之力知問王義之頓首胛劉誤釋作髀
淳化十八

又

想小大悉佳蔡家賓至君情感益深惟當撥遣之耳

淳化二十五

又

知足下散勢小差此慰無以為喻云氣力故爾復以
胡但想散患得差餘當以漸消息耳淳化二十六
胡一作挹

又

吾頃無一日佳衰老之弊日至夏不得有所嗽而猶
有勞務甚劣劣淳化二十七

又

知足下連不快何爾耿耿善將適吾積羸困而下積

日不斷情慮尚深殊乏自力不能悉

淳化二十九米云智永書

又

月半哀悼兼至奈何奈何得告承復下懸耿至勿勿

願不具王羲之再拜淳化三十三〇勿勿劉合作具

又餞行帖

今遣鄉里人往口具也行成旅以從是月也景風司至星火殷宵伯趙鳴而載陰

爽鳩習而揚武時可以升高遠望禮可以出宿餞行有詔具寮爰開祖米云偽帖伯思云賈曾送張說赴朔方序中云備官而行成旅比從是云云有詔具僚爰開祖宴且申後命寵以蕃錫此卷有此文自行字上祖字下皆亡之而作草書多不綴屬當是集逸少書寫此敘耳先輩以為張說送賈至文非也米亦以自是月下為偽殊不知自行成下已偽蓋此失其首尾而米未嘗考賈曾文也〇淳化三十四

又

四月二十三日羲之頓首昨書不悉君可不腫劇憂

之力遣不具淳化三十六

又

羲之頓首濶別稍久眷與時長寒嚴足下何如想清

豫耳披懷之暇復何致樂諸賢從就理當不疎吾之

朽疾日就羸頓加復風勞諸無意賴促膝未近東望

慨然所冀日月易得還期非遠耳深敬宜音問在數

遇信息遽萬不一陳淳化三十七〇黃云字既甚惡而筆語乃爾非逸少書無疑

又

吾昨得一日一起腹中極調適無所為憂但顧情不

可言耳

淳化四十一○米以為張長史書黃云米多以草字差大者為非二王書理恐未竟

又

追尋傷悼但有痛心當奈何奈何得告慰之吾昨頗
哀感便欲不自勝舉旦復服散行之益頓乏推理皆
如足下所誨然吾老矣餘願未盡惟在子輩耳一旦
哭之垂盡之年將無復理此當何益冀小却漸消散
耳省卿書但有酸塞足下念故言散所豁多也王羲
之頓首 米以為大令書黃云字勢園緊既非獻之體中云吾老矣餘願未盡惟在子輩耳案大令壽四十三初無後嗣法書要錄逸少帖內有此○淳化四十五

又

廿日羲之頓首節日感歎深念君增傷災雨君可也

淳化五十四

又

僕可耳力數字王羲之頓首

淳化五十五僕米作餘

又

七月一日羲之白忽然秋月但有感歎信反得去月
七日書知足下故羸疾而觸暑遠涉憂卿不可言吾
故羸乏力不具王羲之白

而劉釋作問淳化五十八

又

阻暑感懷深得書知足下故頓乏食差不耿耿吾故
尔耳未果爲結力不具王羲之

淳化六年十二月

又

初月二日羲之頓首忽然今年感遠兼傷情痛切心

奈何奈何念君哀窮不已羲之皇恐

淳化六十八○皇恐施作呈耳

法書要錄哀窮下云奄經新故仰慕崩絕豈可堪忍比各何似相憂不忘當深消息以全勉爲太僕衰老殆是日不如日力知問王羲之頓首

又

足下時事少可數來至人相尋下官吏不東西未委

若爲言叙乖足下不返重遣信往問願知心素

淳化六十八

九○至一作主吏大觀作更敘一作欲一作命

又

吾惟足下叅朝少晚不審有何事情致使如然也王

羲之再拜

淳化七十

又

十月七日羲之報前過足下所得其書想殊有勞弊然叔兄子孫有數人足慰目前情至取答委曲故具示可令必達以副此志且山川甚有形勢遠想慨然又出藥精要有驗信次可致當大惠也從弟分別吾深憂慮卿女軼軻想何可處差充喜言不多耳羲之

淳化七十三○黃云十月七日帖米以為集成子謂昨見君帖亦然蓋二帖字意皆不相屬而十月帖頗取十七帖中語足慰目前可令必達以副此志遠想慨然等帖中語廁其間如云足下尚停數日得告承長平未佳足下小大佳也知此得丹陽書熱日更甚期已至旦反想至七帖皆後人依放中有云不易可得過夏知有患者早乘涼行皆非當時人語承足下還來一帖不論可見其偽荀侯帖云安好音信明公還得歸洛也詞筆皆如初月帖

又

羲之白君晚可不想比果力不具王羲之白淳化七十七

又

云足下尚停數日半百餘里瞻望不得一見卿此何可言足下疾苦晴便大熱小舩中至不易可得過夏

不甚憂卿還具示問小舩劉釋作北恒一作所恨○淳化七十八

又

熱日更甚得書知足下不堪之同此無賴早且乘涼行欲往遲散也王羲之且一作宜又作旦○淳化八十六

又

七月六日羲之白多日不知問邑邑得二日書知足下昨問耿耿今已佳也淳化八十九○昨一作比

又

月末必往遲見君無以為喻淳化九十二

又

承足下還來已久別欲參慰爲染患不能得往問眷
仰情深豈此委具一兩日少可尋冀言展若因行李
願存故舊今遇賢弟還得數張紙勞動幸不恠耳謹
此代申不具釋智永

米云子敬書大觀第五卷次
智果帖下○淳化九十五

又

雪候旣不已寒甚盛冬平可苦患足下亦當不堪之
轉復知問王羲之

淳化九十六○苦一作吾盛
下要錄有日字轉下有尋字

又

知君當有分住者念處窮毒而復分乖尚可居情想
反理斷當

淳化九十九

又

且反想至所苦晚差不耿耿僕脚中不堪沈陰重痛不
可言不知何以治之憂深力不具王羲之頓首

淳化一百

又

深以自慰理有大斷其思豁之令盡足下勿乃憂之
足下殊當憂吾故具示問

淳化一百一

又

晚復毒熱想足下所苦竝以佳猶耿耿吾至頓劣劣
冀涼意散力知問王羲之頓首

淳化一百二○黃云
上二帖唐文皇所臨

又

足下家極知無可將接爲雨遂乃不復更諸弟兄問疾深護之不具王羲之白

淳化一百三〇淳化羲之白耳從大觀〇米云僞

又

知彼清晏歲豐又所使有無一鄉故是名處且山川形勢乃爾何可以不游目

淳化一百七〇使十七帖作出

又

八日羲之頓首多日不知君問得一昨書知君安善爲慰僕似小差而疲劇昨若耶觀望乃苦輿上隱痛前後未有此也然一日一昔勞復不極以此爲慰耳

力不

淳化一百十六〇似施作此望一作宦若一作者

又

鄉里人樂著縣戶今送其名可爲領受君頃就轉佳不僕自秋便不佳今故不善差頃還少嗽脯又時嗽麪亦不以爲佳亦自勞弊散係轉久此亦難以求泰不去人間而欲求方外此或速弊皆如君言

淳化一百十七

又

便大熱足下晚可耳甚患此熱力不具王羲之上

淳化

一百七十八

又

發瘡比日疾患欲無賴未面邑邑反不具王羲之

淳化

言言
一百二
十三

又

得書知問腫不差乏氣忽忽面近羲之報淳化一百二十四

又

足下各如常昨還殊頓胃中淡悶干嘔轉劇食不可強疾高難下治乃甚憂之力不具王羲之淳化一百二十五

又

潤轉久勞想豈舍知足下常得之卒未近緣如何足下數令知問淳化一百三十〇黃云卒未近緣如何非晉士語

又

十一月四日羲之白冬中感懷深始欲寒足下常疾何如不得近問邑邑吾故苦心痛不得食經日甚為虛頓力及不具王羲之白淳化一百三十一

又

不得執手此恨何深足下各自愛數惠告臨書悵然淳化一百三十三

又

此蒸濕難為人得示知足下故爾堪行想不成病耳吾至無賴行尅王羲之頓首淳化一百三十六〇米云子敬代父書黃云非

也結字不同詞亦異體此與阮公故爾家月末三帖絳帖合而一之

又

羲之白昨故遣書當不相遇知君還喜慰足下時行
想今善除猶耿耿僕時行以十一日而不保如比日
便成委頓今日猶當小勝不知能轉佳不積不卿至
劣劣力還不具王羲之白

淳化一百四十一
○善除一作善保

又

月半哀感奈何奈何念邑邑罔極之至不可居處比
日何似痺差不悒悒力知問王羲之頓首

淳化一百四十三
○米云子敬代父書黃云月半帖雖晉語
字不合作蓋後人寫二王尺牘中語耳

又

日五期結極以大先師之言皆著推此言之無驗如
此事君當欲知故及宜停宅

淳化一百四十八

又

適欲遣書云得示知足下得涼以為佳甚慰知多疾
患念勞心吾故不欲食幾以為事恐不可久邑邑思

面行故果之王羲之

淳化一百五十二
○幾一作此
來邑邑一作區區行疑作拜此
又見續帖無後六字米云
智永書○已上並淳化帖

又

初月十三日山陰羲之報近欲遣此書停行無人
不辨遣信昨至此且得去月十六日書雖遠為慰過屬

卿佳不吾諸患殊劣劣方涉道憂悴力不具羲之報

寶章集○萬歲通天王方慶進帖

又

隔日不面懸遲何極計足下須人兼具此等事勢速

令垂報也 絳帖

又

重告慰情吾腹中小佳體痺乏氣便轉差深以為慰

慰足下意也王羲之頓首 豫章帖

又

羲之白不審尊體比復何如遲復奉告羲之中冷無

賴尋復白羲之白 豫章帖

又

羲之頓首快雪時晴佳想安善未果為結力不次王

羲之頓首山陰張侯 閣古堂帖

又

舊志志道意甚勤至不知為盡心朝夕而已有所希

耳一自任之耳當以君書示 河東薛氏帖

又

九日以當力見

又

言言洞語 卷五十一
祠物當治護信到便遣來忽忽善錯也並書史

又言敘帖

思言叙卒何期但有長歎念告

米云獻之送梨帖柳公權記後細題一行

曰又一帖十二字連之余辨乃右軍書公權誤為子敬也縫有貞觀半印世南孝先字跋印與跋今皆不存而此帖諸名帖中皆無之猶幸有此耳○賜書堂帖

女萋丸帖

知足下哀感不佳耿耿吾下勢腹痛小差須用女萋丸得應甚速也

吳興鮓帖

今付北方脯二夾吳興鮓二器蒜條四千二百又一帖云

今付吳興
酢二器

紫石散帖

二十九日羲之報月終哀摧傷切奈何奈何得昨示知弟下不斷昨紫石散未佳卿先羸甚羸甚好消息吾比日極不快不得眠食殊頓勿令合陽冀當佳力不一一王羲之報

新粟帖

復數橘子即云乃好可噉久得新粟此院冬桃不能得多送觸事何當不存往恒語然獨折

須果帖

言部滄詁 卷五十一
知須果裁便可遣取視君勢陳欲欲無出理

矇風膠帖

矇風膠今年似晚來年其主不起首者想或可得借乎

噉蚌帖

蚌二斛厲二斛前示噉蚌得味今旨送此想噉之故以爲佳比來食日幾許得味不具示

須米帖

知須米告求常如雲此便大乏勅以米五十斛與卿有無當共何以論借

又

今有教勅付米可送之

麻紙帖

下近欲麻紙適成今付三百寫書竟訪得不得其人

示之

並法書要錄

噉豆帖

噉豆鼠傷如佳今送能噉不

淳化十六

鯉魚帖

義之白送此鯉魚征與敬耶不在不乃邑邑不

淳化三十

書說源語 卷五十一
三
舍子帖

信云舍子別送乃是北方物也何以欲此欲幾許淳化

十九

擇藥帖 一作採藥帖

鄉里人擇藥有發簡而得此藥者足下豈識之不乃云服之令人仙不知誰能試者形色故小異莫亦嘗見者謝二侯擇一作採簡作夢亦作與又作可○淳化九十二

叩竹杖帖

周益州送此叩竹杖鄉尊長或須今送淳化一百二十一○鄉二

王帖作卿

狼毒帖

須狼毒市求不可得足下或有者分三兩停須故示

淳化一百三十七

採菊帖 黃以為採藥帖

不審復何以永日多少看未九日當採菊不至日欲其行也但不知當晴不耳

倫等還殊慰意增慨知足下疾患小佳當惠緣想哀能果遲此善散非直思想而已也尋復有問足下以數示由為諸力不具亦淳化一百四十一○倫等以下二王帖云當別作一帖由為諸

別作一帖

黃甘帖

奉黃甘二百不能佳想故得至耳船信不可得不知

前者至不淳化一百四十五

奉橘帖

奉橘三百枚霜未降未可多得豫章帖○枚書史作

○黃云韋應物詩知君臥病思新橘試摘才酸亦未黃書後欲題三百顆洞庭須待滿林霜蓋取諸此也

黃一作嘗須一作更

白石枕帖

白石枕殊佳物深感卿至書史

裹鮓帖

裹鮓味佳令致君所須可示勿難當以語虞令米云右軍

唐摹四帖一帖有裹鮓字薛道祖所収命為裹鮓帖裹鮓之外則安善道意服食三帖是也

筆精帖

紙筆精要深念兒至一物而無所出後信酬缺○米云義之

筆精帖集在諸家碑上縫有貞觀半印當時與大令日寒帖同在故相王曾家故蘭亭所刻亦誤以為羊欣今貞觀印已不復存又紙下少一妙字文亦斷闕難解恐至寶永失姑取以存古當有能辨之者○蘭亭帖

愛鷺帖

數日雨冷腎氣症腰復嗽動靜遇風緊陂湖汎漲船不可渡勿訝謝光祿鵝在山下懸情可愛羲之遣賜書

書言海語
卷五十一
一五
帖堂

野鴨帖

損惠野鴨一雙秋來未得始是嘗新遠能分遣但深
佩耶二謝黃云近世
偽作殊惡

鄣茶帖

節日縈牽少睡鄣茶微炙善佳今姊差耶石首鯨食
之消瓜成水此魚腦中有石如碁子野鴨亦有云此
魚所化乾蝸青黛主風搐搦良

鷓鴣帖

鷓鴣糞白去黥黯癥廕令人色態此禽不卵生口吐

其雛獨爲異耳

鷹嘴帖

鷹嘴爪炙入麝香煎酥酒一盞服之治痔瘻有驗十
七日義之頓首

豉酒帖

又焦小服豉酒至佳數用有驗直以純酒漬豉令
汁濃便有多少任意並賜書
堂帖

石脾帖

此疑
非書

石脾入水卽乾出水便濕獨活有風不動無風自搖
天下物理豈可以意求惟上聖乃能窮理發帖

東書堂帖

東書堂永樂中周藩所刻頗多偽雜不足證憑今附此未前六條乃汝帖也荷華雖已殘及字新竒等語猶惡俗

想佳卿以得速還欲令今早去時反也
省書增感切及反不具羲之報

念足下罔戀之至不可居處白此已具委也

前却食小差數數便得疾政由不消化故

二月廿日羲之頓首二旬期等小祥日近傷悼深至
切割心情奈何奈何近得告爲慰力及數字王羲之
羲之白昨得期書知君可耳

並汝帖

又

治頭

悶或患癰腫頭不卽潰者以此藥帖之皆

良

麻巴豆薰陸石

芎窮松脂六物

擣如米粒

許少加其分頭悶處先其巴豆三分減一松脂剝去
髮方寸以帛帖藥當病上帖之周時帖刮上爛皮以
主麻油和石塗上當有黃水出爲佳羲之上

荷華想已殘處此過四夏到彼亦屢而獨不見其盛
時是亦可訝豈亦有緣耶弊宇今歲植得千葉者數
盆亦便發花相繼不絕今已開二十餘枝矣頗有可
觀恨不與長者同賞相望雖不遠披對邈未可期伏
可勝悵惘耶

近遣傳散有書想旦夕還近健步還得二十八日書
吳興又道此月一日不知何以情恕修歎乃復以示
法謝峰事秋便冷要且令必果

想清和士人佳也此平安安不過停數日日無爲樂
益增想想孔長史安善足下令知問累有書也足下
入年哀得俱還不思以事爲歲

州民王羲之死罪賢弟逝沒甚痛奈何白牋不備羲
之頓首

太尉門左不可言同此酸慨

小大何如二妹佳爲慰諸舍可何新婦委頓態人期

弟各可不想今日能

書暮必來宿也若宜

日思夏羲之報

諸賢子粗足自枝注示吾弱息毀弊大兒恒救命足
令人心焦先是之懽於今皆爲哀苦自非復衰年所
堪豈復以既往累心率事自難爲懷如之何

卿女母子粗平安喪際賢女動氣疾當時乃勿勿今
以除也他等皆知孝思先日之歡於今皆爲哀苦觸
事切人處此而能令哀惻不經於心殆空語耳一至
於此何所復言

此粗平安修載來十餘日諸人近集存想明日當復

悉來無由同增慨

東比何爲慰郎以也謝諸子往矣如何

得書知足下問何萬來一昔不得眠便大乏足下念王羲之

勞人意以書示妹汝毋不多書尋更有信

也

致履足下各一量當嘗長

久此草書嘗多勞亦知足下書字字新奇點點圓轉美不可再書得足下閑下比來遲遲終不可也之果云云

服足下五色石膏散身輕行動如飛也足下更與下七致之不治多少尋面言之委曲之事實亦人尋過江言散

舊京先墓毀動奉諱號慟五內若割痛當柰何柰何王羲之頓首頓首

頃日親親徑過諸婚經卹體力不復堪之故未復遣信耳

二月二日汝婦毋一夜亾親親傷怛汝不可言問足下旨爲致誠答今旨意致來勿忘此意自決今以資嚴知不大疾患念勞心


言古語
卷五十一

十九

言記洞詮卷第五十一

終

國家圖書館, NATIONAL CENTRAL LIBRARY, TAIWAN, R.O.C.



書記洞詮卷第五十二

江東 梅鼎祚 纂輯

晉十八
東晉

王獻之

字子敬羲之第七子歷位中書令世稱大令

辭中令書

獻之自吳興內史徵拜中書令

外出謂公私可安耳勲賞既湊亦已息望但使明公
不遺有會不怠亦何憂便餒耶民志不慕高情不忘
榮懇懇祈誦惟願離今任耳餘無所擇伏度朝恩不
過存愍故舊使蓬蒿與蘭蕙齊榮耳明詔爰發恩已
被矣榮實厚矣必何須拜而治順許而弛今日君臣



之際差可得適願樂也若民有纖芥少裨聖化亦當
求自策效而能臨殊寵必欲免耶思之實熟萬無此
理古來亦未有量力而致深罪者蔡司徒立帝主於
御牀詔驛數反其不祇順正止於免黜耳此外希不
矜體者違命誠爲深愆曲從實復過此伏度天海容
納必當哀許仰憑仁眷惟願垂救動成塵穢轉難爲
顏乃欲覲謁忽患齒痛疼慘無賴語迫罔知所厝冒
復啓諱謹草上呈罄竭款實謂爲粗盡一豪虛矯神
明殛之若民可作尚書今而使四海推慝者亦人誰
不堪勲德蓋世尚當有讓況民凡鄙而可寇竊耶王

懷祖先輩名流作此職可謂僉允桓宣武窺尚書門
猶言此中無人固知當之未易也劉旣不便彌不自
宣故寄之翰墨益增繁忤飢渴還旨願不作悠悠常
誨耳獻之歿罪州民王獻之呈

雪溪堂帖

與郗超論袁宏書

宏爲吏部郎
獻之與超書

彥伯已入殊足頓興往之氣故知捶撻自難爲人冀
小郤當復差耳

世說○已入尺牘作已久誤
王敬美云足窺子敬狹中

玄度帖

玄度時往來以此爲慰與公使適還數日具都下問

人情所憂良可歎息諸從數問齡前來經日極為差

云仁祖欲請為軍司不知行不從一作賢○黃云玄

無名人作僕謂此真晉人語但筆勢疎緩多失落耳謂大令書則非蓋中云仁祖欲請為軍司案獻之以晉孝武太元十一年年四十三卒謝尚於穆帝升平元年卒時獻之方年十三請軍司又在升平前大令是時纔十許歲安得已作書論時事殆是穆帝時他人書玄度何來遲亦此類○淳化二十七

又二王作使還帖

玄度何來遲深令人憂懸耶常謂有理因祠監多感足下共事甚善然所造極難想足下每思先後卿豈須言親親不已意耳安石停此過半日猶得一宿送近道所以致歎何物喻之一十當浦陽諸懷兒不可

言且不復得卿送有諸歎今此貪上道大觀帖○淳化誤摹何物

一行在前送近一行在後○常淳化作當卿二王帖作公貪一作奕○黃云亦似逸少語張長史輩偽作

鄱陽帖

獻之白不謂鄱陽一門艱故至此追尋悲惋益不自勝奈何奈何政坐視其滅盡使人悲熟賴子高在此不爾無可成獻之淳化十七○熟尺牘作熱不爾作下爾誤

又二王作散騎帖

鄱陽書停諸舍便有月未具散騎書知情至草草未發遣奉去月間承婦等復不能差深憂慮耳淳化五十

又

鄱陽歸鄉承脩東轉有理吾賢畢欲事必俟勝歡慰
于懷耶吾終權宜至承今年饑饉仰惟年支都乏絕
不謂乖又至於此耶吾脚尚未差極憂也淳化七十

鐵石帖

近與鐵石共書令致之想久達不得君問以復經月
懸情豈可言頃更寒不適頗有時氣君頃各可耳遲
旨問僕大都小佳然疾根聚在右髀脚重痛不得轉
動左脚又腫疾候極是不佳幸食眠意事為復可
冀非臧病耳淳化十四

又二王作
敬懷帖

知鐵石前往快作樂諸君善處世一達於當年不復
過此僕端坐將百日為尸居解日耳不知那得一散
懷何其相思之深臨書意塞二王帖云東坡詩有已
將鐵石充逸少之句蓋
坡疑以為嚴鐵石故云按詩註嚴鐵石梁人非及與
右軍父子同時今所謂與鐵石共書豈兩子張耶○
淳化四十五

德遠帖

前告先以陳事意必是更有家信未知期說見德遠
書所致人耶何可足下今耶下今施作卒念
○淳化三十一

祖希帖張玄字
祖希

知祖希佳為慰慰數不得書其云至水門增深款之

法書
要錄

授衣帖

獻之歿罪授衣諸感悲情伏惟哀慕兼慟痛毒難居
見徐儁并使君書承比極勝但承此凶問當復大頓
耳比日憂馳無復意不審尊體云何脚及可痛氣得
此哀號何如先大惡時炎創特不堪此不乃為患眠
食幾許使君今地實難為識然所以為識政在此耳
當今可復使不萬全不願其以多筭難易得之便自
可令不為因絜耳比者忉怛當不可言當不可言獻
之歿罪大觀帖○淳
化在此耳止

衛軍帖

衛軍猶未平和而哀勞殊未得盡消息理常以不寧
僕射得散力甚慰表解臺職不知得恕不復冠軍告

懸企

復一作後○
淳化十三

府君帖

二王作
極熱帖

獻之白極熱敬惟府君此月內得書來時幾得問希
此消息極悶悶軍中復如何患膿不能潰意甚無賴
君有好藥必時復與府中多少極濟事耶

黃云極熱
敬惟府君

帖云來時幾得問希此消息極悶悶又云意甚無賴
君有好藥云云極濟事邪又服油帖云不至絕艱辛
也皆近世俗言字勢亦不至佳
非王氏帖明甚○淳化五十七

領軍帖

還此今有書何以至不知諸舍故多患念勞以今差
也得領軍書故在風丹楊書常疾動耿耿亦云得鄱
陽近書為慰丹陽疾者不果來甚悵恨

云一作足○淳化六十三

叅軍帖

東家尚未欲下李叅軍無政日有此議能自來此方
寸無使聞上極不妙之事獻之頓首

淳化六十五

冠軍帖

六十帖委曲合慶等已至也為一帖

委曲前書具想勝常也諸人悉何如承冠軍定入計
今向達都汝奉見欣慶但恐停日不多耳

淳化四十八

又

承冠軍故爾不覺轉勝灸無所覺憂馳深汝憔悴可

言

淳化五十八○又帖憔悴可耳

別郗氏妻

郗曇女名道茂

獻之初娶郗氏女為祕書丞尚新安公主及
獻之遇疾道家上章法應首過對曰不覺餘
事惟憶與郗家離婚 王氏譜咸寧中尚餘
姚公主○黃云奉對帖當是與郗家離婚也
郗氏自太尉鑒後為江左名族其姓讀如絺
繡之絺世人以俗書郗字作郗因讀為卻詵
之卻非也卻詵乃晉大夫卻毅郗鑒乃漢御
史大夫郗慮之後姓原既異音讀迥殊亦近
代氏族及小學二家之學不講故也陸魯望
博古矣其詩云一段清香染郗郎亦誤讀也

雖奉對積年可以為盡日之歡常苦不盡觸類之暢

方欲與姊極當年之足以之偕老豈謂乖別至此諸
懷悵塞實深當復何由日夕見姊耶俯仰悲咽實無
已無已唯當絕氣耳淳化十八○俯仰施
作纏綿○當一作常

與兄徽之書徽之
見後

兄伯蕭索寡會遇酒則酣暢忘反乃自可矜世說

歲終帖

獻之白節過歲終衆感纏心伏惟同之奉月初告承
極不平復頭眼半體赤恒惡兄告說姊故殊黃瘦憂
馳可言寒切不審尊體復何如眠食轉進不氣力漸
復充耳遲復旨告獻之故爾獻之淳化十○
充一作先

礬石帖

獻之白兄靜息應佳何以復小惡耶伏想比消息理
盡轉勝耳礬石深是可疑事兄熹患散輒發癰勢爲
積乃不易願復更思獻之惟賴消息內外極生冷而
心腹中恒無他此一事是差但疾源不除自不得佳

論事當隨宜思之也獻之白勢一作熱爲積尺牘作
爲治○黃云散者寒食

散之類散中蓋用礬石是性極熱有毒故云深可疑
也劉表在荊州與王粲登障山見一岡不生百草粲
曰此必古冢其人在世服生礬石熱蒸出外故草木
焦滅鑿看果礬石滿瑩又今洛水冬月不冰古人謂
之溫洛下亦有礬石今取此石置瓮水中水亦不冰
又鶴伏卵以助煖氣其烈酷如此固不宜餌服子敬
之語實然聊附于此又云賴消息內外極生冷內
外二字本行旁注故字差小而昧者摹填著行中非

也當依本為勝諸帖中此例甚多如十七帖中遠想慨然孔琳之帖恨恨脚中轉劇等字本皆側注後人摹以入行○淳化十六

又姊性舊合舉石為一帖

姊性纏綿觸事殊當不可獻之方當長愁耳當劉作常

違遠帖

吾十一日發吳興違遠兄姊感戀無喻慶等別不可言比奉告故多患姊經感極頓憂馳益深適諮議十六日告風疾故爾反側餘可行未東動靜不寧吾宜速吳與丞別兄進猶戀罔勞亦極惡馳情二女晚生皆佳未復華姜疏比來得直疏故惡故足當視華也

汝兒女竝可不淳化二十三○吾一作五

廿九帖

廿九日獻之白昨遂不奉恨深體中復何如弟甚頓

勿勿不具獻之再拜黃云此近世人語非子敬書二王帖云黃以為昨遂不奉恨

深帖有秦漢篆筆中令自言故自不同真不虛爾書中有相勞苦語極佳讀之了不可解者當是箋素敗逸觀其可讀者知其爾爾○淳化二十四○奉下一有別悵二字

又

獻之白承姊故常惡不審得春氣復何如冬馳情餘

安和至寧此故耳獻之白法書要錄

鵝還帖二王作諸舍帖淳化及二王帖鵝還云云并合上為一今按其刻鵝還原提作

行首則此當別爲一帖王氏尺牘以鷺還鷺
差名鷺還帖而無崇虛一條今並仍鷺還之
名其舊名各附注
諸舍亦載於前

諸舍復何如吾家多患憂面以問慰情不知可耳承
永嘉比復患下上下下諸疾患乃爾焦馳豈可懷不審
今復何如媵卽平和耳貞壽不成病不淳化二〇
憂一作望

又

鵝還慰姊意今已嘗向發分張諸懷可言殊嘗復憂
懸婢腹痛見差不劉家疾患卽差秀已還也已嘗陳
作已當

○淳
化三

又二王作
慶至帖

慶等已至也鵝差不甚懸心宜道尋去奴定西諸分

張少言

淳化四十九〇道
一作還一作送

又鷺羣
帖

獻之等再拜不審海鹽諸舍上下動靜比復常憂之
姊告無他事崇虛劉道士鵝羣竝復歸也獻之等當
須向彼謝之獻之等再拜鹽劉作監須一作便誤〇
黃云鵝者王氏子姓之小

字耳猶袁羊顧虎之類或以此鵝卽逸少所愛之鵝
甚可鄙笑又帖云崇虛劉道士鵝羣並復歸也獻之
等須向彼謝之亦非當時尺牘體蓋以大令父逸少
嘗書道德經換鵝而山陰曇曠村道士舉羣贈之故
以此事傳會作是帖耳案崇虛館乃宋明帝泰始四
年建子敬晉人何得已稱之又案魏收釋老志太和
十五年詔立道家寺宇於桑乾之陰名崇虛寺去晉
愈遠矣王云此乃黃長睿東觀餘論而揚引爲已

辨亦可笑也然書家頗重鵞羣帖按此明載法帖
辨誤不必餘論○二王帖注黃云右軍寫經換鵞時
子敬尚幼少未必能作此簡好事者為之爾如貞觀
初楊師道輩可作此字恐不其然人之善書蓋有自
幼天成者況子敬耶○
淳化七十一○米云偽

散情帖

獻之白不審疾得損未極憂及更能出入未前書云
至於散情媿疾苦療得所深喜慰想必為問敬和晚
際似差耶諸舍也能向諸第各也敬和王洽○
淳化五十六

使君帖

媿等承更惡不審頃痊復不必須散時終得力耶此
藥甚佳想姉舉體不能行履服遂差安西且無恙府

君屬有和稀久滯行路同人絕得此心故當攜其長
幼詣汝上下知彼駱驛有書示不足以慰吾意耶冬
間必欲至足下所居承使君明練不謂漸有勝也君
數集聚然其大都可耳吾止於月半間耶黃云嫂等
帖亦非大
今書○淳化六十九○詣一
作諸數一作散可耳作可

承姑帖

獻之白承姑比日復小進退其爾不得一極和憂悚
猶深不審以服散未必得力耳比隣相聞故云惡懸
懷使君數得書也大觀帖○淳化承
承姑以一作比

阿姑帖

二王作
平安帖

近奉阿姑告知平安極慰人意獻之遂不堪暑氣力
恒懈恐是惡風大都將息近似小却淳化六十

東陽帖

不審阿姨所患得差否極令懸惻想東陽諸妹當復
平安不審頃者情事漸差耶彼郡今載甚不能佳不
知早晚至當遂至郡深相望淳化五十二

敬祖帖

王協

敬祖日夕還山陰與嚴使君聞頗多歲月今屬天寒
擬適遠爲當奈何奈何爾豈不令念姊遠路不能追
求耳淳化七十二
君劉作知誤

永嘉帖

願餘上下安和知婢日夕疏慰意育故羸懸心倪比
健也適奉永嘉去月十一日動靜故常患不寧諸女
無復消息獻之淳化十一
○餘奉各重一字

又

育等可不轉思見之知恩慕不中法書要錄

天寶帖

白東告具天寶疾患問何其倉卒之子孫常欣倫早
成家以此娛上下豈謂奄失此女愍惜深至惻切心
懷媿哀念當可爲心情願不可保使人惋惋悲政當

隨事豁之耳嫂先積弊復有此痛心不審不乃惡不
甚以憂馳眠食復多少願遣無益盡消息理淳化二
十二〇

之一作令
當劉作常

仲宗帖

一月廿九日告仲宗奉世諸兒禍變無常淳化三
十三

黃門帖

黃門隕背哀痛摧剝不自勝任奈何奈何及書感塞

父姑告黃門兄徽之也〇淳化三十四
黃云亦王氏帖而非大令書

秀順帖

可必不耳企遲此大都如常秀順至慰意順心痛委

頓焦勞淳化三
十八

靜婢帖

諸舍不能集會深哽塞仰料靜婢自常不和知從事

甚簡致此佳也淳化
十九

豹奴帖

豹奴此月惟省一書亦不足慰懷深悉足下情素耳

淳化五十三〇豹劉作斲誤桓嗣小
字豹奴王氏甥故二王帖中時及之

江州帖

知汝決欲來下是至願然嫂當得供養冀郡固有理
若宣城瑯琊不果南有空缺可作者此信還具白當

與在事論為不可須留者便可決作來下記也上方
 大枋想汝不過數枋足彼故當足合偶此耳人方當
 粗足不果耳可白吾當托桓江州助汝此不辨得遣
 人船迎汝當具東改枋枋三四吾小可當自力無湖
 迎汝故可得五六十人小枋諸謝當有便是見今當
 語之大理盡此信還一一白胛痛不可堪而比作書
 欲不能成之法書要錄○淳化帖四十二云吾當託桓
 具東改枋三四吾小可者當自力無湖迎汝故可得
 五六十人小枋諸謝當有便是見今當語之大理盡
 此信還具白胛痛可堪而以此作書絕欲不可識○黃
 辯云吾當託桓江州助汝帖米以為張長史書雖未
 必然要非大令書也案此帖不至惡但縱任近俗無
 晉世清韻真非大令書殊不知亦寫右軍帖詞耳張

彦遠右軍帖錄有此語此卷亾其半續帖逸少部中
 有前段結字殊應模矩蓋王氏子弟臨逸少書勝此
 遠矣二王帖云按法書要錄此帖前有知汝欲來
 等數十字內吾字作五字不可識作不能成之乃在
 逸少帖中當以彦遠為是王著以逸少無大草書故
 置獻之帖中耳○攻劉施作改可者黃諫作去無湖
 劉作無御諫作仰小枋諫作小楊
 皆非○當有下六十帖多一有字

二妹帖

忽動小行多晝夜十三四起所去多又風不差脚更
 腫轉欲書疏自不可已惟絕歎於人理耳二妹復平
 平昨來山下差靜岐當還淳化四十七
 岐一作政

諸女帖

想彼悉佳汝復見諸女不此近下故爾耳淳化七○
 近一作上

言詩洞詩 卷五十二
阮新婦帖

一帖下後有君白二字

諸女無日事懸心阮新婦何日至慰姊目下

淳化四

又

阮新婦勉身得雄甚善散騎殊常喜也

淳化十八○常陳作當

郝新婦帖

令外甥欲問郝新婦更篤憂慮深

淳化三十五○令一作念欲一作知

范新婦帖

謝范新婦得

缺

富春過諸道路安隱甚慰懸心比日

涼卽至平安也上下集聚欣慶也華等佳不小婢比小下大都可耳新婦舍其行更憐之不可言范新婦

省

絳帖○米云余收子敬范新婦唐模帖嘗題詩曰正觀款書丈二紙不許兒竒專父美而絳帖誤以爲右軍○東書堂帖佳不後云自新婦母子去寂漠難言思子輩不可言

新婦帖

新婦服地黃湯來似減眠食尚未佳憂懸不去心君等前所論事想必及謝生未還何爾進退不可解吾

當書問也

淳化五十○何一作可

慰意帖

得諸慰意吾故冀惡尋視汝又告

東近諸帖

未復東近動靜馳情昨卽遣行爲不至耶

又

二十三日獻之問得十九日書之間後何如吾故劣力不一一王獻之問

又

向聞游諸縣作今退念時事缺覽之後復慨然

又

五月十二日獻之白節過感懷深至念痛傷難勝得五日告知君轉勝甚慰甚慰雨過此復何如想消息日平復也謹僕近暴不佳如惡氣當時極惡賴卽退耳故虛劣勿勿還不多王獻之白

又

思想轉思省告知君亦同如今未知面期近遠此慨可言惟深保愛數音問尋故旨取君消息

又

信明還東有還書願送來已今分明至著都上

又

慰之吾故沈頓思見之故想時能問疾得來先報之不能得自致者旨取車王獻之答

又

獻之白奉承問近雪寒患面疼腫脚中更急痛兼少

下甚馳情轉和佳不審尊體復何如得此諸患小差不復思何如幸能復散故鎮益久藥何以不更將之遲尋復肯若獻之弊於淡飴飲得春風氣昏亂言故欲熱復食酒爲腹可耳獻之白

並法書
要錄

相過帖

相過終無復日悽切在心未嘗整撥一日臨坐目想勝風但有感慟當復如何常謂人之相得古今洞盡此處殆無恨于懷但痛神理與此而窮耳盡此感深殆無冥處常恨況相遇之難而乖其所同省告不覺澆流既已往矣亦復何言獻之

淳化一○撥一作撥
冥一作真澆一作澆

○黃云相過無復日
借匪獻之韻自可賞

安和帖

獻之白奉別告承安和慶慰極冷不審尊體復何如獻之比日如復小勝因夜行忽復下如欲作瘳今服藥盡溫燥理冀當可耳然異極都不得復小失和卿惡亦不復得妄近生冷體氣頓至此令人絕歎行有佳酒便服

淳化六○何如一作何必卿黃諫作已行
陳作何酒劉作治○大觀帖此下有獻之

二字施謂別用
摹入此帖者

餘杭帖

獻之白思戀觸事彌至獻之既欲過餘杭州將若比

還京必視之來月十左右便當發奉見無復日比告
可喻願復盡珍重理獻之白

見劉作兄
淳化九

晴快帖

再拜夏節近感思深惟窮號崩絕不可忍處晴快不
審體中何似食噉復多少甚馳情不審諸舍復何如
未復西動靜不寧此多患反側願深寬勉故承問

作知○淳
化十二

珍重帖

思戀無往不慰省告對之悲塞未知何日復得奉見
何以喻此心惟願盡珍重理遲此信反復知動靜

淳化

夏日帖

夏日感思兼悼切割心懷痛當奈何奈何得思道書
慰意薄熱汝比各可不吾竝故諸惡勞益勿勿獻之

白疏

淳化
二十

慕容帖

慕容有易賴意耶

淳化二十八○
米云無名人偽

薄冷帖

薄冷足下沈痼已經歲月豈宜觸此寒耶人生稟氣
各有攸處想示消息

淳化二十九○薄冷益部
二帖米以爲歐率更書

益部帖

黃云借陳壽所著益部耆舊傳也

益部耆舊傳今迭想催驅寫取耳慎不可過淹留吾去月從孫家求信次頓爾頓為亂反側錫大佳柳六惠言錫可常餌亦覺有益耳

淳化三十〇耳劉作了〇錫疑別一帖

思戀帖

獻之白思戀轉不可言瞻近而未得奉見但有歎息遲諸信還具動靜獻之白

淳化三十六〇信一作攸又作作

轉勝帖

黃云疾不退至分張語類江表人

疾不退潛處當日深豈可以常理待之此豈常憂不審食復何如肌色可可所堪轉勝復以此慰馳竦

耳

淳化四十一〇如下大觀帖有云字〇義之有此帖潛處作潛損當作亦當

消息帖

消息亦不可不恒精以經心向秋冷疾下亦應防也獻之下斷來恒患頭項痛復小尔耳

項施作頂〇淳化四十二

集聚帖

省前書故有集聚意當能果不足下小大佳不聞官前逼遣足下甚急想以相體恕耳足下兄子以至廣州耶當有得集理不念懸心也耳

淳化四十三

近豫帖

白承舍內分違近豫遂就難以喻痛濟理獻之白

淳化

復面帖

復面悲積蕃首以不佳耿耿僕近動散委頓雖轉折
猶愒然發止尚以未定日冀以言首力還不復耳

六十二○黃云復面悲積宋齊人語

西問帖

得西問不冠復云何令人邑邑具示
冠劉釋作寢○淳化六十四

月終帖

獻之言月終伏惟哀傷不可任不審尊體諸患復何
如悚息謹言疏不備獻之言
淳化六十五○還此西問月終米云皆偽

尊體何如帖

獻之白不審尊體復何如昨夜眠多少願盡寬喻理
憂馳可復言若得消息者獻之
者劉作告一作去○淳化六十八

中秋帖

十二月割至不中秋不復不得想未復還慟理為即
甚省如何然勝人何慶等慶等大軍
書史○東書堂慶故可勦敗也

日寒帖

日寒涼得告承諸惡
缺 復灸極嘗慘痛悲灼僕病

正自不差疾久自
缺 目深悲企甚積既慘塞居疾係

以罪黜二三不職出門近疑所叙似不
益企恨秋

言言評語 卷五十三
牽借請有人當復叙耳

蘭亭帖○米云日寒帖後有兩行謝安批所謂批後爲答也唐太宗不收獻之帖上刮去不次獻之白字謂之羊欣以應募而蘭亭帖亦以爲羊欣書

南中佳音帖

南中佳音一一小慰解數月也吾甚憂慮卿君何如

耶獻之

愛民堂帖

白鮓帖

適得元直二十三日疏送白鮓今送十裹似竝猶堪

嗽獻之白

法書要錄

服黃耆帖

承服腎氣丸故以爲佳獻之比服黃耆甚勤平平耳

亦欲至十齋當可知

淳化二十五○齊劑通用劉釋作齋誤

湯酒帖

得書爲慰吾先夜遂大得服湯酒諸治漸折故頓極難勞知足下便去不得面別快恨深保愛臨書增懷

王獻之

快一作悵○淳化二十六

鴨頭丸帖

鴨頭丸故不佳明當必集當與君相見

淳化五十一

服油帖

服油得力更能停嗽麪只五六日停也不至絕艱辛也足下明當必果想卽日如何深想憶

淳化五十九

送梨帖

今送梨三百顆晚雪殊不能佳

淳熙所刻及賜書堂皆右軍米以為大令

鏡湖帖

鏡湖澄澈清流瀉注山川之美使人應接不暇

楊云世說

王右軍云每行山陰道上如鏡中游與此可互觀父子高致如此○王云按世說稱子敬云不言尺牘

王凝之

字義之子歷會稽內史為孫恩所害

庾氏女帖

八月廿九日告庾氏女明便授衣感逝悲歎念增遠思得郗中書書說汝勉難安隱深慰懸心微冷產後何似宜佳消息吾竝更不佳憂之遣不次凝之等書

淳化帖

夜來有書之外嘉否吾以此時必去於彼發諸弟問嚴史勅令廣州主不得進止在道憂此後未有問但不知云何不具

東書堂帖

王徽之

字子猷義之子歷黃門侍郎

徽之等帖

二日告
氏女新月哀摧不自勝奈何奈何念痛慕不可任得疏知汝故異惡懸心雨濕熱復何似食不吾牽勞並頓勿後數日還汝比自護力不具徽之等

書

寶章集

言言詩 卷五十三
得信承媿疾不減憂灼寧復可言吾便欲往恐不見
汝等湖水泛漲不可渡遂復隔絕不然尋已往彼故
遺疏知吾遠懷不具徽之等告淳化帖

王操之

字子重義之子
歷豫章太守

雜帖

十二月廿七日具疏操之獻之再拜歲盡無復日感
思兼懷不自勝兄亦同之奈何奈何奉十二日告承
掾安和慰馳情姊三兄諸患故爾不損憂馳晴快不
審尊體竝復何如遲復來告操之故平平已再服散
冀得力獻之亦惡憊勿謹拜疏不具操之等再拜

八月十九日具疏操之獻之再拜昨日諸願悉達奉
告慰馳心極冷不審尊體復何如操之創故不差常
惡亦故尔憊憊獻之昨來復下如欲作瘳殊乏極服
石的丸冀得力謹謹不具操之等再拜淳化帖○
奉重一字

得姜

順消息懸心操之頓首

淳化帖○
懸一作慙

又

十月十七日州民王操之頓首頓首舊京先墓毀動
聞問傷惻痛不可言未得陳慰白牋不備操之再拜
操之等報白承中書便以安厝永畢念弟追痛傷惟

不得奉訣哀恨深不可堪奈何操之等報白並東書堂帖

王渙之義之子

二嫂帖

渙之等白不審二嫂常患復何如馳情論直等平安計嫂倫奴已應在道企遲適東五日動靜最差速姑如復小勝冀遂和耳猶不寧餘上下故常患反側此悉佳渙之等白淳化帖○上下施合作長

王胡之字修齡廩子西中郎將司州刺史

與庾安西牋

此間萬頃江湖撓之不濁澄之不清而百姓有投一

綸下一筌者皆奪其魚器不輸十疋則不得放不知漆園吏何得持竿不顧漁父何得鼓枻而歌滄浪也

太平御覽

遺王洽書洽見後

王洽拜中書令時年二十九將辭免胡之遺之書

昔大將軍事故吾年二十九在烏衣宅諸文臺門詣謝不共北窓牀上悲嘆云今山二求為貧賤不可得第今二十九便居清顯要任敢不敬以先旨為弟啓義讓之路焉若弟年至四五十之間雖復超登公輔亦非吾所豫況降此以還者耶晉陽秋○此有脫誤

王彪之

字叔武廐弟之子歷尚書令轉護軍將軍加散騎常侍

與會稽王牋

臺符廬陵公主薨於瑯邪東海二王為姑二王出為人後主又出適今應降服小功然本是周親情重始薨方當制服而疑可婚與不彪之為太常謂雖降服本亦齋練之親不應成婚與會稽王牋論之

王者君臨萬國以禮義聲教也今若皇子獨違規矩恐遐邇之談不必許也且自元康以來朝臣之家犯禮婚者不見重責故尚書僕射裴頠當代名士于時以兄弟子喪末為息拜時其息服除也議者父子並應貶責兄弟子下流之喪不同於姑古者諸侯絕周

而卿大夫之喪在殯猶不舉樂不以本周喪未葬行嘉禮也况廬陵長公主於禮不應絕服喪况今未葬

乎

杜氏通典

上會稽王昱牋

揚州刺史殷浩屯壽春陰遣人誘秦梁安雷弱兒使殺秦王健許以關右之任弱兒偽許之且請兵應接浩遂帥眾北伐欲進據洛陽彪之為吏部尚書上牋以為云不從會姚襄邀擊于山桑大敗昱謂彪之曰君言無不中張陳無以過也

弱兒容有詐偽浩未應輕進

資治通鑑

與揚州刺史殷浩書

漢建安中劉劭字孔才為計吏到許太史上言正旦當日蝕劭時在尚書令荀彧所坐客

數十人或云當廢朝或云宜却會劭曰梓慎
禘竈古之良史猶占水火錯失天時禮記曰
諸侯旅見天子及門不得終禮者四日蝕在
一然則聖人垂制不為變豫廢朝禮者或災
消異伏或推術謬誤也或善其言勅朝會如
舊日亦不蝕至晉康帝建元元年太史上元
日合朔疑應却會與否庾冰輔政寫劉劭議
以示八坐于時有謂劭為不得禮意蔡謨遂
著議非之冰從眾議遂以却會至永和中和般
浩輔政又欲從劉劭議彪之時為廷尉據咸
寧建元故事與浩書
浩從之亦竟却會

太史上元日合朔談者或有疑應却會與不昔建元
元年亦元日合朔庾車騎寫劉孔才所論以示八座
于時朝議有謂孔才所論為不得禮議荀令從之是
勝人之一失也何者禮云諸侯旅見天子入門不得

終禮而廢者四太廟火日蝕后之喪雨露服失容尋
此四事之指自謂諸侯雖已入門而卒暴有之則不
得終禮非為先存其事而徼倖史官推術鎔謬故不
豫廢朝禮也夫三辰有災莫大日蝕史官告譴而無
懼容不脩豫防之禮而廢消救之術方大饗華夷君
臣相慶豈是將處天災罪已之謂且檢之事實合朔
之儀至尊靜躬殿堂不聽政事冕服御坐門闥之制
與元會禮異自不得兼行則當權其事宜合朔之禮
不輕於元會元會有可却之準合朔無可廢之義謂
應依建元故事却元會

晉書

王恬

字敬豫導第二子歷吳國會稽內史加散騎常侍

得示帖

得示知足下問吾故不差殊劣劣力不具王恬白

淳化帖

王洽

字敬和導第三子拜駙馬都尉遷中書令領軍將軍

襍帖

洽白辱告承問洽故爾劣劣冀以復叙還白不具王

洽再拜

白一作日

又

洽頓首言不孝禍深備嬰荼毒陰侍亾兄仁愛之訓

冀終百年永有憑奉何圖慈兄一旦背棄悲號哀摧

肝心如抽痛毒煩寃不自堪忍酷當奈何痛當奈何

重告側至感增斷絕執筆哽涕不知所言洽頓首言

備旁有豫字

又

洽頓首言兄子號毀不可忍視撫之摧心發言哽慟

當復奈何奈何洽頓首言

又

洽白向感塞不成敘得告承問殊乏劣白不具王洽

再拜

並淳化帖

王劭 字敬倫導子
吳國內史

夏節帖

劭白明便夏節哀慕崩摧肝心抽絕煩冤彌深不自
忍任痛當奈何當復奈何得告為慰腫轉差勞悴勿
勿力及不次王劭再拜 淳化帖

王蒼 字敬文道第六子
侍中鎮軍將軍

癰腫帖

蒼頓首 **為念吾癰腫知甚此**

賴力不具 寶章集

王邃 海陵恭侯

張丞帖 承一作巫

寒佳不張丞婚事云何是良對足下可時令知文決
也王邃白 淳化帖

王珣 字元琳洽長子歷衛
將軍加散騎常侍

薦戴逵啟

逵孝武帝時以散騎常侍國子博士累徵不就乃逃於吳與吳國內史王珣遊處太元末皇太子出東宮珣為詹事與太傅會稽王道子等上疏薦參僚侍會病卒見晉書戴逵傳按此啟亦必其時也

國子博士戴逵遠既素業 **約瑜淳若使紆迹儒官**

發家庶子必足弘振禮樂 北堂書鈔

以桓謙為中庶子啓謙見後

東宮之選中庶子管摠門下尤不可不得其才也太平

未冬帖

三月四日珣頓首未冬衆感得七月書知問即日何

如秋弊憂之劣不具王珣頓首白淳化帖○秋一作服

王珣字季琰洽少子歷中書令

答徐邈書

見傳咸彈孫詹事或云是宮或云坊或云寺此東宮中別有坊又中庶子稱坊詹事稱寺寺同於九卿耳

坊是通名如天朝之稱臺者也王隱晉書

又

詹事彈肅一宮如尚書令中丞也北堂書鈔○太平御覽作如尚書左

丞矣○詹事秦官掌皇后太子家唐嗣許王制彈違是屬宜肅事於東朝李寬制承華彈肅之寄任賢斯在皆本此

襍帖

珉頓首頓首此年垂竟悲懷兼割不自勝奈何奈何寒切體中比何似甚耿耿僕疾遂不差眠食少憂深

遣書不次王珉頓首頓首黃伯思云珉帖末云輔國司馬君此無後五字

又

十八日珉白比二書暫至未更近問懸情不適比可不吾羸疾故尔憂深力書不具王珉敬問

具施作乙乙

又

何如僕故頓弊力書不次

又

王珉頓首頓首上下何如僕上下大都蒙恩得書至

之吾亦

後闕○淳化合上一帖

又

今欲出耳吾此月急遣廿四是王濟祖日欲必赴卿可尅過明吾當下解相待餐出亦遣報既至王家畢

贈可豫檄光公令作一頓美食可投其飯也王珉相

報

吾下大觀有早字○並淳化帖

王循

中軍將軍義之族

秋月帖

七月廿四日循遮頓首秋月感恩深得近示為慰餘

熱比復可不僕疾患故爾不平復頓勿力書不盡王

循遮頓首

褚遂良義之書目有阿遮帖張彥遠帖語中有報敬倫遮恐是王氏子姓米云偽○

遮一作舊非

沈嘉

字長茂吳郡人吳興太守見寶裊述書賦淳化帖作沈嘉長誤

感懷帖

十二月十三日嘉頓首頓首歲有感懷深寒切想各平安僕勞弊遣不具沈嘉頓首頓首淳化帖

張翼字君祖下邳人東海太守穆帝令翼寫王羲之手表帝自批後羲之不能別久乃悟云小人亂真

節過帖

廿三日張翼頓首節過多懷得近書為慰意以何如

僕勞弊頓良力還不具僕一作深淳化帖

劉瓌之字元寶沛國人御史中丞義城伯○書史云太元中孝武帝改治宮廟欲使王獻之

隸草題榜固辭帝使瓌以八分書淳化作劉瓌脫之字

感閨帖

瓌之頓首頓首未陽遠感閨知有患耿耿知以自慰恨不相見力及不比望瓌之頓首頓首大觀帖

謝潘伯散騎常侍

江東帖

此計江東精兵不可卒得惟當善養見者而事慮日多如比來憂懷實已萬端淳化帖

謝發

晉安帖

晉安素自彊壯且年時尚可當延遐期豈調奄至於此自畢遠境二三惋愕不能已已未欲旨問悲酸悒

言沛詩 卷五十三
悒想不久可得還耳執筆惻感

淳化帖○米云偽

王公幹

東書堂作陳人

前至帖

東書堂一帖云省足下書意甚佳也時皆平安無復為念○偽

前至諸故佳

汝帖

王彬

二人汝帖作晉度江人按彬乃梁侍中仁祖為謝尚豈彬書右軍帖語耶

仁祖帖

得仁祖廿一日示知侍中已還廣陵四月必來居此

足下為至視之

汝帖

陳逵

伯思云陳逵者晉中郎將淳化云陳朝陳逵誤矣大觀作晉中郎將陳逵置四卷第一

逵白帖

十二月廿五日逵白歲終感慘寒切足下何如遣不

悉陳逵

伯禮啓明願問訊足前許借介燾今遣請受願付今

使仰干悚息謹啓

足一作兄遣一作進使劉施作佳○按伯禮乃陳文帝子武陵王陳

伯禮也淳化附陳逵東書堂並作陳

無名氏

古法帖

淳化置衛夫人後

知賢弟至舍寒想顧之傷歎遂爾永惟痛壽春富陽
范道長體氣似小勝前日得此暑大都大都尋常新
婦書寄物示諸人散騎二君何時還兄子皆佳能數

書言源詩 卷五十三
三十一
爲也

似一作以
淳化帖

問行帖

天氣且未佳汝定成行否寒食近得且住爲佳耳

楊

此帖或以爲真卿書非也乃真卿寫晉人帖辭耳或以爲右軍帖亦無的證故標以無名氏附晉人禳帖云○宋辛稼軒詞宦游吾倦矣玉人留我住道明日是落花寒食得且住爲佳耳晉人之語一入聲律其妙如此

晉人三日帖

三日詩文旣佳興趣復高覽之增諸懷年少作各有

心

黃伯思蘭亭詩跋

書記洞詮卷第五十二

終

書記洞詮卷第五十三

江東 梅鼎祚 纂輯

晉

十九 東晉 ○ 諸女二晉

桓玄

字敬道一名靈寶溫孽子襲封南郡公篡付國號楚為劉裕所誅

與會稽王道子論王珣書

珣嘗為玄父溫主簿歷散騎常侍卒玄與道子書論之

珣神情朗悟經史明徹風流之美公私所寄雖逼嫌
謗才用不盡然君子在朝弘益自多時事艱難忽爾
喪失歎懼之深豈但風流相悼而已其崎嶇九折風
霜備經雖賴明公神鑒亦識會居之故也卒以壽終

殆無所哀但情發去來寘之未易耳

晉書○豈但世說作豈惟

答牋

晉中興書

王珣拜尚書左僕射領吏部時烈宗雅好典籍深欽愛之與殷仲堪徐邈並以才學文章為上所昵玄

王珣明悟疎徹風流之美雖逼於同異才用不盡然君子在朝所益自多也

致會稽王道子書

道子既錄百揆為長夜之飲政無大小一委世子元顯會孫恩入寇至京口元顯柵斷石頭率兵距戰頻不利既而恩遁北海玄復據上流致牋于道子元顯覽而大懼尋統軍討玄玄傳檄京師罪狀元顯次新亭元顯軍潰收付廷尉害之道子徙安成郡以酖死

賊造近郊以風不得進以雨不致火食盡故去耳非力屈也昔國寶卒後王恭不乘此威入統朝政足見其心非侮於明公也而謂之非忠今之貴要腹心有時流清望者誰乎豈可云無佳勝直是不能信之耳用理之人然後可以信義相期求利之徒豈有所惜而更委信邪爾來一朝一夕遂成今日之禍矣阿衡之重言何容易求福則立至于忤或致禍在朝君子豈不有懷但懼害及身耳玄忝任在遠是以披寫事

實 晉書○王國寶始摠國權勢傾朝廷王恭舉兵討之道子收斬國寶以謝恭後恭復起兵元顯敗滅

之

與殷仲堪書

王恭起兵討江州刺史王愉譙王尚之等玄與龍驤將軍楊佺期荆州刺史殷仲堪應恭及恭敗誅以玄為江州楊佺期為雍州黜仲堪為廣州仲堪與佺期推玄為盟主申理恭在已俱與玄猜貳佺期乃密與仲堪共襲玄佺期兄南蠻校尉楊廣欲距玄兄偉玄于是西征聲云救洛與仲堪書使仲堪殺楊廣如其不爾無以相信仲堪佺期及廣等並為玄所殺○佺期弘農華陰人

佺期受國恩而棄山陵宜共罪之今親率戎旅逕造

金墉 晉書

同前

後魏書別與桓偉書令為內應偉違遠以書示仲堪仲堪慰喻遣歸夜乃執之

今當入沔討除佺期頓兵江口若相與無貳可殺楊

廣若其不尔別當率軍入江

晉書殷仲堪本傳玄將討佺期先告仲堪云云

不言為書○資治通鑑載玄與仲堪書云佺期受國恩而棄山陵宜共罪之今當入沔討除佺期已頓兵江口若見與無貳可收楊廣殺之如其不爾便當帥兵入江 按此是合晉魏二書而為一也

與殷仲文書

仲文仲堪從弟為玄諮議參軍遷侍中玄平歷東陽太守坐謀反伏誅

桓玄素輕桓脩脩在京京下有好桃玄連就求遂不辨得佳者玄與仲文書以為嗤笑○脩小字崖故世說云桓崖歷江州刺史玄篡封安成郡王劉裕起見殺○續晉陽秋云脩少為玄所侮於言端常嗤鄙之

德之休明肅慎貢其楛矢如其不爾籬壁間物亦不

可得也

世說新語

與劉牢之書

牢之字道堅彭城人歷會稽太守

元興初牢之南討玄牢之以道子昏闇元顯淫凶慮平玄之日亂政方始會玄遣書說牢之遂許玄降尋與子敬宣謀襲玄事泄自縊死

今君戰敗則傾宗戰勝則覆族以是安歸乎孰若翻然改圖惟理是宅保其富貴全其勲業則身與金石等固名與天壤俱窮孰與頭足異處身名俱滅為天下笑哉夫明者見於無形愚夫安於所耽二者成敗惟君圖之藝文類聚○按晉書本傳云朝廷將討玄以牢之為前鋒都督征西將軍領江州事牢之深懷疑貳率北府文武屯洺州玄遣何穆說牢之曰自古亂世君臣相信者有燕昭樂毅玄德孔明然皆勲業未卒而二主早世設使功成事遂未保二臣之禍也鄙語有之高鳥盡良弓藏狡兔殫獵犬烹

故文種誅於勾踐韓白戮於秦漢彼皆英雄霸王之主猶不敢信其功臣况凶愚凡庸之流乎自開關以來戴震主之威挾不賞之功以見容於闇世者而誰至如管仲相齊雍齒侯漢則往往有之况君見與無射鉤屢逼之仇邪今君戰敗則傾宗戰勝亦覆族欲以安歸乎孰若翻然改圖保其富貴則身與金石等固名與天壤無窮孰與頭足異處身名俱滅為天下笑哉惟君圖之前書即此說辭之半而詳略稍異晉史諸家最繁不知甄文抑何據也

與劉邁書

邁字伯羣

劉裕與劉毅等謀起兵討玄毅兄邁先在京師使為內應時玄以邁為竟陵太守邁不知所為便欲之郡是夜玄與邁書邁晨起白之玄封邁為重安侯既而廉邁實同謀殺之

北府人情云何卿近見劉云何所道

宋書

與羊欣書

欣見後

言言
羊孚卒玄與欣書○
羊氏譜孚即欣從祖

賢從情所信寄暴疾而殞祝予之歎如何可言世說新語

與袁宜都論嘯書袁山松為宜都太守

讀卿歌賦序詠音聲皆有清味然以嘯為髣髴有限
不足以致幽旨將未至耶夫契神之音既不俟多賡
而通其致苟一音足以究清和之極阮公之言不動
蘇門之聽而微嘯一鼓玄默為之解顏若人之興逸
響惟深也哉

袁山松一名崧字山松喬之孫歷吳郡太守為孫恩所害

答桓南郡論嘯書

嘯有清淨之美而無控引之深歌窮測根之致用之
彌覺其遠至乎吐辭送意曲究其奧豈唇吻之切發
一往之清冷而已哉若夫阮公之嘯蘇門之和蓋感
其一奇何為徵此一致大疑嘯歌所拘耶並藝文類聚○至乎

尺牘作至矣徵此作徵此誤

王恭字孝伯太原晉陽人歷平北將軍徐兗二州刺史起兵討譙王尚之等戰敗送建康見殺

與沈警書警字世明吳興永康人

恭以前將軍鎮京口與警有舊好復引為參軍手書殷勤若相招致尋復謝職子穆夫少好學恭命為前軍主簿與警書穆夫字彥和為賊孫恩所用敗死警亦坐誅

足下既執不拔之志高臥東南故屈賢子共事非以

吏職嬰之也 宋書

王廞 字伯輿瑯邪臨沂人歷司徒左長史

靜媛帖

告誘靜媛靜儀靜姝此晦便當假葬永痛抽剝心情
分割不自勝念汝等追痛摧慟纏綿斷絕何可堪任
痛當奈何當復奈何遣涕不次廞疏八月日

祖台之 字元辰范陽人官侍中光祿大夫

與王荊州書 王忱字元達坦之少子歷驃騎長史出為荊州刺史數年卒官

忱自恃才氣放酒誕節及鎮荊州威風肅然
殊得物和末年尤嗜酒一飲連月不醒或裸
體而游每歎三日不飲便覺
形神不相親台之與書諫之

君頃復飲不古人以酒為篤誠通識之士往往累加
此物君受重任憂深責大至於酒一條事目下先急
僕請以諫願君屏爵棄卮焚壘毀榼殛儀狄於羽山
放杜康於三危流王武於幽都拘谷陽於崇山四罪
既除道自康矣古人繫重離必有贈言僕之與君其
能已乎 太平御覽○古人以
下據竇苻酒譜補入

羊孚 字子道泰山南城人

詣桓玄牋

玄下都孚時為兖州別駕從京來詣門與玄
牋玄見牋馳喚前云子道子道來何遲即用
為記室叅軍卒官

言言源記 卷五十三
自頃世故睽離心事淪蕙明公啓晨光於積晦澄百
流以一流 世說

殷仲堪

陳郡人歷荊州刺史
爲桓玄攻敗自殺

致謝玄書

尺牘作與
桓玄誤

玄以冠軍將軍鎮京口以仲堪爲長史
厚任遇之仲堪致書於玄玄深然之

胡亾之後中原子女鬻於江東者不可勝數骨肉星
離荼毒終年怨苦之氣感傷和理誠喪亂之常足以
懲戒復非王澤廣潤愛育蒼生之意也當世大人旣
慨然經略將以救其塗炭而使理至於此良可歎息
願節下弘之以道德運之以神明隱心以及物垂理

以禁暴使足踐晉境者必無懷感之心枯槁之類莫
不同漸天潤仁義與干戈竝運德心與功業俱隆實
所期於明德也頃聞抄掠所得多皆採梠飢人壯者
欲以救子少者志在存親行者傾筐以顧念居者吁
嗟以待延而一旦幽繫生離歿絕求之於情可傷之
甚昔孟孫獵而得麇使秦西以之歸其母隨而悲鳴
不忍而放之孟孫赦其罪以傳其子禽獸猶不可離
況於人乎夫飛鴉惡鳥也食桑椹猶懷好音雖曰戎
狄其無情乎苟感之有物非難化也必使邊界無貪
小利疆弱不得相陵德音一發必聲振沙漠二寇之

言言評語 卷五十三
黨將靡然向風何憂黃河之不濟函谷之不開哉晉書

答桓玄論四皓書

玄在南郡論四皓來儀漢庭孝惠以立而惠帝柔弱呂后凶忌此數公者觸彼塵埃欲以救弊二家之中各有其黨奪彼與此其讐必與不知匹夫之志四公何以逃其患素履終吉隱以保生者其若是乎以其文贈仲堪仲堪乃答之玄屈焉

隱顯默語非賢達之心蓋所遇之時不同故所乘之塗必異道無所屈而天下以之獲寧仁者之心未能無感若夫四公者養志巖阿道高天下秦網雖虐游之而莫懼漢祖雖雄請之而弗顧徒以一理有感沉然而應事同賓客之禮言無是非之對孝惠以之獲

安莫由報其德如意以之定藩無所容其怨且爭奪滋生主非一姓則百姓生心祚無常人則人皆自賢況夫漢以劔起人未知義式遇姦邪特宜以正順爲寶天下大器也苟亂亾見懼則滄海橫流原夫若人之振策豈爲一人之廢興哉苟可以暢其仁義與夫仗節委質可榮可辱者道迹懸殊理殊不同君何疑之哉又謂諸呂彊盛幾危劉氏如意若立必無此患夫禍福同門倚伏萬端又未可斷也于時天下新定權由上制高祖分王子弟有磐石之固社稷深謀之臣森然比肩豈瓊瓊之祿產所能傾奪之哉此或四

公所預于今亦無以辨之但求古賢之心宜存之遠
大耳端本正源者雖不能無危而其危易持苟啓競
津雖未必不安而其安難保此最有國之要道古今
賢哲所同情也 晉書

與桓王牋

所致玉佩允潤清越可謂瓊瑤之惠也

謝桓王牋

尺牘答會稽稽王道子誤

奉所賜馬鎧既足獎厲懦心又以光華遠任

並北堂書鈔

仲堪為太子與宮臣令云朝廷遂為吾營宮室顧省不才而大興後費深用愧惕冬氣已應作者殊常寒苦可使監殿舍人一月資酒肉稱勞賜之吾蒙月俸錢上生塵無所用之可以供事 按此令尺牘亦載

顧愷之

字長康晉陵無錫人歷散騎常侍

與殷仲堪牋

愷之作殷荆州佐請假還東爾時例不給布
殷
飄苦求之乃得發至破冢遭風大敗作牋與

地名破冢真破冢而出行人安穩布飄無恙

世說

諸葛長民

瑯邪陽郡人歷豫州刺史領淮南太守

貽劉敬宣書

敬宣與劉毅有私憾毅出為荆州欲請為南蠻長史敬宣懼禍以告宋高祖劉裕裕以為北青州刺史尋領冀州裕為太尉西討劉毅長民監太尉留府事貽敬宣書敬宣復報書便以長民書呈裕裕謂王誕曰阿壽故為不負我○敬宣小字阿壽

盤龍狼戾專恣自取夷滅異端將盡世路方夷富貴

之事相與共之宋書○毅小字盤龍毅誅後長民猜懼有異謀劉裕使壯士拉殺之

劉敬宣字萬壽牢之子歷豫州刺史右將軍為左右所殺

報諸葛長民書

下官自義熙以來首尾十載遂忝三州七郡今此杖

節常懼福過災生實思避盈居損富貴之旨非所敢

當南史○災宋書作禍

湛方生

與劉驃騎讓中正牋

清定之選實須其人北堂書鈔

劉謚之

與天公牋太平御覽亦載賴詹公借袍南城送火

體戰身噤脫衣凍坐賴公借袍南越送火藝文類聚○越一作岳

又

在於建寧之邑始得數年相遲方欲教奴學耕使婢

執杼初學記

又

昔申酉之際遭湯旱流煙今子亥之歲值堯水滔天

火延燒其廬水突壞其田何小人兮頓偷雙船由是

行無擔石室如磬懸太平御覽○諸載謚之或似西晉或晉宋間無可定

張君平

與妹憲書

念諸里舍皆富財賄往褻襲蔽紛華照曜於是之際

想汝懷愧

婦人集○太平御覽引載尺牘張華後亦無的據今聊附此

孔珠

與長史王佐書

朝不著鞶囊不知為可不

王佐答孔珠書

尋此鞶囊是內則施鞶之遺象此為箴線之屬非朝

服所著

太平御覽○湛方生至月所著王佐並無世次爵里

陶淵明

字元亮或云潛字淵明尋陽柴桑里人起家州祭酒為鎮軍建威將軍彭澤令解綬

去職徵著作郎不就世稱靖節先生○晉書名潛字元亮南史潛字淵明吳仁傑作年譜云在晉名淵明在宋名潛

與子儼等書

淵明弱年薄宦不潔去就之迹自以曾祖晉世宰輔耻復屈身後代自宋高祖王業漸隆不復肯仕與子書以言其志并為訓誡云

告儼俟份佚佟天地賦命生必有死自古賢聖誰能

獨免子夏有言死生有命富貴在天四友之人親受

音旨發斯談者將非窮達不可妄求壽夭永無外請

故耶吾年過五十少而窮苦每以家敝東西游走性

剛才拙與物多忤自量為已必貽俗患僂俛辭世使
 汝等幼而饑寒余嘗感孺仲賢妻之言敗絮自擁何
 慙兒子此既一事矣但恨鄰靡二仲室無萊婦抱茲
 苦心良獨內愧少學琴書偶愛閒靜開卷有得便欣
 然忘食見樹木交蔭時鳥變聲亦復歡然有喜常言
 五六月中北窻下臥遇涼風暫至自謂是羲皇上人
 意淺識罕謂斯言可保日夕遂往機巧遂踈緬求在
 昔眇然如何病患以來損親舊不遺每以藥
 石見救自恐大分將有限輩稚小家貧每役柴
 水之勞何時可免念之在心若何可言然汝等雖不

同生當思四海皆兄弟之義鮑叔管仲分財無猜歸
 生伍舉班荆道舊遂能以敗為成因喪立功他人尚
 爾況同父之人哉潁川韓元長漢末名士身處卿佐
 七十而終兄弟同居至于沒齒濟北汜幼春晉時操
 行人也七世同財家人無怨色詩曰高山仰止景行
 行止雖不能爾至心尚之汝其慎哉吾復何言陶靖節集

○聖賢羣輔錄韓融字元長潁川人大鴻臚兄弟同居至于沒齒處卿相之位且二十年奉身守約不隕厥明
晉中興書汜毓字稚春奕世儒業敦睦九族客居青州逮毓十世人號其家兒無常父衣無常主
○梁昭明太子蕭統陶淵明傳云妻翟氏亦能安勤苦與其同志南史云潛妻翟氏志趣亦同能安苦節
夫耕於前妻鋤於後按淵明年二十喪妻繼娶翟氏為此書時已年過五十矣書所云感孺仲賢妻之言

又云室無萊婦何與史傳旨豈翟是時復凶邪
後漢隱逸傳王霸字儒仲疑孺誤○張續辨証云
先生高蹈獨善宅志超曠視世事無一可芥其中者
獨於諸子拳拳訓誨有命子詩有責子詩有告儼等
疏厚積於躬薄取於世其後宜
有興者而六代之際迄無所聞

與子書 宋書

天地賦命有往必終自古賢聖誰能獨免子夏言曰
死生有命富貴在天四友之人親受音旨發斯談者
豈非窮達不可妄求壽夭永無外請故邪吾年過五
十而窮苦荼毒家貧弊東西游走性剛才拙與物多
忤自量為已必貽俗患僂俛辭世使汝幼而飢寒常
感孺仲賢妻之言敗絮自擁何慙兒子此既一事矣

但恨鄰靡二仲室無萊婦抱茲苦心良獨罔罔少年
來好書偶愛閒靜開卷有得便欣然忘食見樹木交
蔭時鳥變聲亦復歡爾有喜嘗言五六月北窻下臥
遇涼風暫至自謂是羲皇上人意淺識陋日月遂往
緬求在昔眇然如何疾患以來漸就衰損親舊不遺
每以藥石見救自恐大分將有限也恨汝輩稚小家
貧無役柴水之勞何時可免念之在心若何可言然
雖不同生常思四海皆兄弟之義鮑叔敬仲分財無
猜歸生伍舉班荆道舊遂能以敗為成因喪立功他
人尚爾況共父之人哉潁川韓元長漢末名士身處

言言詩 卷三十三
卿佐八十而終兄弟同居至于沒齒濟北汜稚春晉
時操行人也七世同財家人無怨色詩云高山仰止
景行行止汝其慎哉吾復何言

南史而窮下有居字

與子書

潛爲彭澤令不以家累自隨送一力給其子書曰

汝旦夕之費自給爲難今遣此力助汝薪水之勞此

亦人子也可善遇之

昭明太子淵明傳

淵明答龐參軍詩序云三復來貺欲罷不能自爾鄰曲冬春再交款然良對忽成舊游俗諺云數面成親舊况情過此者乎人事好乖便當語離楊公所歎豈惟常悲吾抱疾多年不復爲文本旣不豐復老病繼之輒依周孔往復之義且爲別後相思之資此本詩序尺牘乃載作書非

寡婦淑

原失姓

答兄弟書

二寡婦者淑也曷也淑喪夫守寡兄弟將嫁之誓而不許爲書○此爲婦尺牘作晉女淑

蓋聞君子導人以德矯俗以禮是以烈士有不移之志貞女無迴二之行淑雖婦人竊慕殺身成義歿而後已夙遭禍罰喪其所天男弱未冠女幼未笄是以僂俛求生將欲長育二子上奉祖宗之嗣下繼祖禰之禮然後覲于黃泉永無慙色仁兄德弟旣不能厲高節於弱志發明明於闇昧許我他人逼我于上乃命官人訟之簡書夫智者不可惑以事仁者不可脅

以歿晏嬰不以白刃臨頸改正直之辭梁寡不以毀形之痛忘執節之義高山景行豈不思齊計兄弟備託學門不能匡我以道博我以文雖曰既學吾謂之

未也杜預女記

杜有道妻嚴氏字憲京兆人十八而娶誓不改節

與從姪預書

預為秦州刺史被誣徵還嚴氏與預書戒之預後果為儀同三司

諺云忍辱至三公卿今可謂辱矣能忍之公是卿坐

晉書

衛瓘女

赤牘作衛夫人鑠王云按張懷瓘書斷廷尉展女弟恒之從妹恒瓘子鑠係瓘從女

本傳止稱瓘女與國臣書不言衛夫人恐楊誤耳 衛夫人自有書見後

與國臣書

瓘歷位司空進太保歸第賈后以惠帝初為太子時瓘嘗欲廢立素惡瓘且忌其方直又聞瓘與楚王瑋有隙遂謗瓘與汝南王亮欲為伊霍之事啓帝作手詔使瑋免瓘等官瑋夜使清河王暹收瓘與子若孫九人同被害及瑋伏誅瓘女與國臣書於是前太保王簿劉繇等上言朝廷乃追瓘伐蜀勳封蘭陵郡公增邑三千戶謚曰成而族誅害瓘一門者

先公名謚未顯無異凡人每恠一國蔑然無言春秋之失其咎安在悲憤感慨故以示意晉書

陶侃母湛氏豫章新淦人夫丹賢明有法訓

責子侃書

侃少為尋陽縣吏嘗監魚梁以一
坵鮮遺母湛氏封鮮及書責侃

爾為吏以官物遺我非惟不能益吾乃以增吾憂矣

公日書

同前 世說

陶公少時作魚梁吏嘗以坵鮮餉母母封鮮付使反書責侃曰

汝為吏以官物見餉非惟不益乃增吾憂也

幽明錄云陶公

在尋陽西南一塞取魚自謂其池曰鶴門劉孝標云吳司徒孟宗為雷池監以鯪餉母母不受非侃也疑後人因假為此說○列女後傳云吳光祿勳孟宗為監魚池司馬罷職道作兩器鮮以歸奉母母怒曰吾老為母戒言惟聽汝飲水宗曰於道作之非池魚也母曰汝為主魚吏而獲鮮以歸豈可家至戶告耶乃還鮮於宗宗謝罪遂沈鮮於江

鈕滔母孫氏瓊

滔吳興人舉孝廉松陽令瓊集二卷

與虞定夫人薦環夫人書

虞潭母孫氏拜武昌侯太夫人謚定夫人

吳郡富春人孫皓族孫女

瓊聞與賢崇德聖主令典旌善表操有邦盛務伏見
族祖吳國亾民富春孫彥妻環少厲令節服膺道教
逮嫡孫氏恪居婦職宗姻有聲奉禮未周彥母喪殞
喪殞半年彥奄亾沒環率禮奉終抗義明節傾竭私
產以供葬送禮服既終前無立子家欲改醮誓而不
許

藝文類聚

答虞吳國書

即定夫人

咸和中避蘇峻亂於臨安山吳國遣使餉饋答書

此果有胡桃飛穰飛穰出自南州胡桃本生西羌外剛樸內柔甘質似古賢欲以奉貢

太平御覽

與從弟孝徵書

省爾譏我以養鵠乃戒以衛懿滅斃之禍斯言惑矣吾未之取彼衛懿之好民無役車之載鵠有乘軒之飾禍敗之由由乎失所若乃開圃匹於靈囿沃池矩乎神沼文魚躍於白水素鳥翔乎神州豈非周文之德大雅所脩哉夫嘉肴旨酒非不美也夏禹盛以陶豆殷紂貯以玉杯而此聖以興彼愚以滅蓋置之失

所如其無失來難可施乎

藝文類聚。鵠鶴古同。

徐藻妻陳氏

與妹書

陳統字元方絃字偉方姊適東莞徐氏生邈一同郡劉氏四人並有美才

伏見偉方所作先君誄其述詠勲德則仁風靡墜其言情訴哀則孝心以叙自非挺生之才孰能克隆聿脩若斯者乎執詠反覆觸言流淚感賴交集悲慰並至元方偉方並年少而有盛才文辭富豔冠於此世竊不自量有疑一言略陳所懷庶備起予先君既體弘仁義又動則聖檢奉親極孝事君盡忠行已也恭養民也惠可謂立德立功示民軌儀者也但道長祚

短時乏識真榮位未登高志不遂本不標方外迹也
老莊者絕聖棄智渾齊萬物等貴賤忘哀樂非經典
所貴非名教所取何必輒引以為喻耶可共詳之

類聚

劉臻妻陳氏

聰敏能屬文嘗正旦獻椒花頌見晉書

答舅母書

元方春秋始富德業亦隆弘道博文才質兼備冀志
與時暢榮耀當年豈意一朝冥然長往季方沖幼過
庭莫聞聖善明訓業成二徙亦既冠婚雙譽允集庶
幾借老色養膝下而殃厲橫流艱禍仍遘媛姊傾逝

宗模永絕姊方玄華竝天歲年豈慮豈圖禍降彌酷
良才夭於始立崇基殞於一匱仰痛殄滅俯悼二弟
斯人斯命當可奈何母年踰耳順備經百罹一紀之
中四遭至痛目前廓然三從靡託窮悼中發情馳難
處

藝文類聚

蘇韶

授從弟節書

韶字孝先安平人仕至中牟令卒伯父承為南中郎軍司第九子節在車上晝日韶自外入乘馬著黑介幘黃練衣白襪幽履憑節車轅曰吾欲改葬將為書節授筆不肯曰歿者書與生者異為節作其字像胡書也乃笑即喚節為書節與韶語徒見其口動亮氣高聲

言
終不爲傍人所聞

古昔魏武侯浮於西河而下中流顧謂吳起曰美哉
河山之固此魏國之寶也吾性愛好京洛每往來出
入瞻眎邙山樂哉乎萬世之基也北背孟津洋洋之
河南望天邑濟濟之盛此志雖未言銘之於心矣不
圖奄忽所懷未果前去十月便速改葬在軍司墓次
買數畝地便自足矣

王隱
晉書

書記洞詮卷第五十三終

書記洞詮卷第五十四

江東 梅鼎祚 纂輯

晉二十〇
諸僭國

前趙

劉淵 字元海新興匈奴人冒頓之後自稱大單于據離石國號漢稱漢王尋僭稱帝在位七年

致王彌書

彌東萊人為淵征東大將軍石勒襲殺之

淵稱漢王時彌為寇進逼洛陽王師擊破之渡河歸淵遣侍中兼御史大夫郊迎致書於彌署司隸校尉遂與劉曜等攻陷宮城

以將軍有不世之功超時之德故有此迎耳遲望將

國家圖書館 NATIONAL CENTRAL LIBRARY, TAIWAN, R.O.C.

軍之至孤今親行將軍之館輒拂席洗爵敬待將軍

晉書
劉曜字永明聰族子拜相國靳準弒聰子誅準襲位十一年改國號趙後為石季龍所敗

下侍中喬豫和苞書

曜將於霸陵西南營壽陵豫等上疏諫之曜下書

二侍中懇懇有古人之風烈矣可謂社稷之臣也非二君朕安聞此言乎以孝明於承平之世四海無虞之日尚納鍾離一言而罷北宮之役况朕之闇眇當今極弊而可不敬從明誨乎今勅悉停壽陵制度一

遵霸陵之法詩不云乎無言不酬無德不報其封豫安昌子苞平輿子竝領諫議大夫可敷告天下使知區區之朝思聞過也自今政法有不便於時不利社稷者其詣闕極言勿有所諱

猗尼渠餘國

遺劉聰

聰字玄明淵第四子襲僭位
聰子約死一指猶煖及蘇言見淵於不周山謂約曰東北有遮須夷國無主久待汝父為之汝父後三年當來汝且還道遇一國曰猗尼渠餘國引約入宮與約皮囊一枚曰為吾遺漢皇帝劉郎後年來必見過當以小女相妻約歸置皮囊於机上俄而蘇使左右机上取皮囊開視之有一方白玉題文云云聰曰若審如此吾不懼死也及死與此玉并葬焉

猗尼渠餘國天王敬信遮須夷國天王歲在攝提當

相見也前趙錄

後趙

石勒

字世龍本名匄上黨武鄉羯人初為盜歸汲桑桑敗歸劉淵及曜封趙公自稱趙王

據襄國僭即帝位

奉幽州刺史王浚

浚字彭祖沉子

浚時署置百官奢縱淫虐勒有吞併之意欲先遣使以觀察之乃遣其舍人王子春等多齎珍寶奉牋推崇浚為天子浚大悅遣使報勒答以方物勒襲浚殺之

勒本小胡出於戎裔值晉綱弛御海內飢亂流離屯

厄竄命冀州共相帥合以救性命今晉祚淪夷遠播

吳會中原無主蒼生無繫伏惟明公殿下州鄉貴望

四海所宗為帝王者非公復誰勒所以捐驅命興義

兵誅暴亂者正為明公驅除爾伏願殿下應天順時

踐登皇祚勒奉戴明公如天地父母明公當察勒微

心慈盼如子也

後趙錄○晉書作表○王云觀此則勒之兇狡信所謂鐵中錚錚者矣

石勒載記云祖述牙門童延害新蔡內史周密遣使降勒勒斬之送首于述曰天下之惡一也叛臣

逃吏吾之深仇將軍之惡猶吾惡也按此未明為書尺牘載與祖述劉曜圍京城索縑使其子

請以城降曜斬送愍帝曰帝王之師以義行也孤將軍十五年未嘗以譎詭敗人必窮兵極勢然後

取之今索縑所說如是天下之惡一也輒相為戮之若審兵食未盡者便可勉強固守如其糧竭兵

微亦宜早悟天命孤恐軍威一振玉石俱摧此見索縑傳與前甚類天下之惡一也語同

石虎

虎字季龍勒從子弒勒子弘自立稱趙天王

上石勒稱尊號疏

勒歸劉曜進爵趙公季龍及張敬張賓與司馬張屈六程遐文武等上疏乃稱趙王

臣等聞有非常之度必有非常之功有非常之功必有非常之事是以三代陵遲五伯迭興靜難濟時績侔睿后伏惟殿下天縱聖哲誕應符運鞭撻宇宙弼成皇業普天率土莫不來蘇嘉瑞徵祥日月相繼物望去劉氏威懷于明公者十分而九矣今山川夷靜星辰不孛夏海重譯天人係仰誠應外御中壇卽皇帝位使攀附之徒蒙寸尺之潤請依劉備在蜀魏王

在鄴故事以河內魏汲頓丘平原清河鉅鹿常山中山長樂樂平十一郡并前趙國廣平陽平章武渤海河間上黨定襄范陽漁陽武邑燕國樂陵十三郡合二十四郡戶二十九萬爲趙國封內依舊改爲內史準禹貢魏武復冀州之境南至盟津西達龍門東至于河北至于塞垣以大單于鎮撫百蠻罷并朔司三州通置部司以監之伏願欽若昊天垂副羣望也

前涼

張軌

字士彥安定烏氏人歷拜侍中太尉涼州牧西平公

與東羌校尉韓稚書

軌為涼州刺史威名大震遂霸河西永嘉初稚殺秦州刺史張輔軌遣中督護汜瑗率眾二萬討之遺稚書稚得書而降

今王綱紛撓牧守宜勅力勤王適得雍州檄云卿稱兵內向吾董任一方義在伐叛武旅三萬駱驛繼發伐木之感心豈可言古之行師全國為上卿若單馬軍門者當與卿共平世難也 晉書

張軌傳涼州大族張越本隴西內史遣兄鎮移檄廢軌以軍司杜耽攝州事使耽表越為刺史軌令曰吾在州八年不能綏靖區域又值中州兵亂秦隴倒懸加以寢患委篤寔思歛迹避賢但負荷任重未便輒遂不圖諸人橫興此變是不明吾心也吾視去貴州如脫屣耳欲遣主簿尉髦奉表詣闕便速脂轄將歸老宜陽 此 令也且通行國內尺牘亦裁

張寔 字安遜軌世子拜征西大將軍為帳下所害

遺南陽王係書

寔襲父軌為涼州刺史知劉曜逼遷愍帝遣司馬韓璞等東赴國難復遺南陽王係書會帝崩問至係謀稱尊號寔奉表江南推崇元帝

王室有事不怠投軀孤州遠域首尾多難是以前遣賈騫瞻望公舉中被符命勅騫還軍忽聞壯地陷沒寇逼長安胡崧不進麴允持金五百請救於崧是以決遣騫等進軍度嶺會聞朝廷傾覆為忠不達於主遣兵不及於難痛慨之深歿有餘責今更遣韓璞等惟公命是從 晉書○瞻望公舉通鑑作瞻公舉動忽作俄是以作遂痛慨作憤痛

張天錫

字純嘏寔曾孫襲涼州刺史大將軍大都督苻堅滅之為征南司馬歸晉

答校書祭酒索商

天錫數宴園池政事頗廢商上疏極諫天錫答之

吾非好行行有得也觀朝榮則敬才秀之士翫芝蘭則愛德行之臣覩松竹則思貞操之賢臨清流則貴廉潔之行覽蔓草則賤貪穢之吏逢颶風則惡凶狡之徒若引而申之觸類而長之庶無遺漏矣

晉書

遺郭瑀書

瑀字元瑜敦煌人苻氏末為略陽王穆太府左長史軍師將軍瑀隱于臨松蘿谷作春秋墨說孝經錯緯弟子著錄千餘人天錫遣使者孟公明持節備禮徵之并遺瑀書公明至山瑀指翔鴻示之曰此鳥也安可籠哉遂深逃絕跡

公明拘其門人乃出就徵

先生潛光九臯懷真獨遠心與至境冥符志與四時消息豈知蒼生倒懸四海待拯者乎孤忝承時運負荷大業思與賢明同贊帝道昔傳說龍翔殷朝尚父鷹揚周室孔聖車不停軌墨子駕不俟旦皆以黔首之禍不可以不救君不獨立道由人弘故也況今九服分爲狄場二都盡爲戎穴天子僻陋江東名教淪於左袵創毒之甚開闢未聞先生懷濟世之才坐觀而不救其於仁智孤竊惑焉故遣使者虛左授綬鶴企先生乃眷下國

晉書○軌一作軌

陰澹

請索襲

襲字偉祖敦煌人虛靖好學不與當世交張茂時敦煌太守陰澹奇而造焉因請為三

今四表輯寧將行鄉射之禮先生年耆望重道冠一時養老之義實繫儒賢既樹非梧桐而希鸞鳳降翼器謝曹公而冀蓋公枉駕誠非所謂也然夫子至聖有召赴焉孟軻大德無聘不至蓋欲弘闡大猷敷明道化故也今之相屈遵道崇教非有爵位意者或可然乎

晉書○按此雖不言書然既非似面語亦非教令多書記之屬耳附存之

謝艾

初為主簿以戰功授太府左長史封福祿縣伯為張祚所殺

與楊初密令

張重華襲涼州牧西平公時石虎遣將王擢麻秋等侵寇不輟以艾為將軍拒戰屢破之秋退保大夏擢遁還河南

今遣舍人孔章特口論要密將軍可差腹心人致旨珊瑚鞭勒香瓔一具遺王擢王擢狐疑於將軍父子事得施矣

太平御覽

索遐

諫張重華

重華字泰臨駿第二子襲父自稱涼州牧西平公假涼王重華自以連破勅敵頗怠政事希接賓客司直索遐上諫重華見之大悅優文答謝

然不知改也

殿下承四聖之基當昇平之會荷當今之任憂率土之塗炭宜躬親萬機開延英又夙夜乾乾勉於庶政自頃內外囂然皆云去賊投誠者應卽撫慰而彌日不接國老朝賢當虛已引納詢訪政事比多經旬積朔不留意接之文奏入內歷月不省廢替見務注情於棊奕之間繾綣左右小臣之娛不存將相遠大之謀至使親臣不言朝吏杜口愚臣所以迴惶忘寢與食也今王室如燬百姓倒懸正是殿下銜膽茹辛厲心之日深願垂心朝政延納直言周爰五美以成六德捐彼近習弭塞外聲脩政聽朝使下觀而化

晉書

後涼

呂光

字世明略陽氏人初仕苻堅堅歿據姑臧僭稱大涼天王在位十年

遺後將軍楊軌書

光散騎常侍太常郭騰據東苑以叛推軌為盟主軌自稱涼州牧西平公光遺軌書軌不答遂北赴騰議欲決戰騰素善占候每以天文裁之兵敗軌走南奔廉川騰奔於乞伏乾歸

自羌胡不靖郭騰叛逆南藩安否音問兩絕行人風傳云卿擁逼百姓為磨唇齒卿雅志忠貞有史魚之操鑒察成敗遠侔古人豈宜聽納姦邪以虧大美陵霜不彫者松柏也臨難不移者君子也何圖松柏彫

於微霜而雞鳴已於風雨郭麇坐卜小數時或誤中
考之大理率多虛謬朕宰化寡方澤不逮遠致世事
紛紛百城離叛戮力一心同濟巨海者望之於卿也
今中倉積粟數百千萬東人戰士一當百餘入則言
笑晏晏出則武步涼州吞麇咀業綽有餘暇但與卿
形雖君臣心過父子欲全卿名節不使貽笑將來

晉書

○光建康太守段業
時亦稱涼州牧叛

北涼

張披

上沮渠蒙遜書

蒙遜自爲涼州牧張披公時木連理生於
永安披爲永安令上書蒙遜後自稱涼王
異枝同幹遐方有濟化之應殊本共心上下有莫二
之固蓋至道之嘉祥大同之美徵

晉書

西涼

李玄盛

諱暲字玄盛小字長生隴西成紀人初
仕北涼段業效穀令領秦涼二州牧自
稱涼公據敦煌僭
謚爲涼武昭王

誠諸子手令

玄盛領秦涼二州牧護羌校尉奉
表詣闕遷居于酒泉手令誠諸子

吾自立身不營世利經涉累朝通否任時初不役智
有所要求今日之舉非本願也然事會相驅遂荷州

士憂責不輕門戶事重雖諄人事未知天心登車理
轡一日慮填曾後事付汝等粗舉旦夕近事數條遭意
便言不能次比至于杜漸防萌深識情變此當任汝
所見深淺非吾勅誠所益也汝等雖年未至大若能
克已纂脩比之古人亦可以當事業矣苟其不然雖
至白首亦復何成汝等其戒之慎之節酒慎言喜怒
必思愛而知惡憎而知善動念寬恕審而後與衆之
所惡勿輕承信諄審人核真僞遠佞諛近忠正蠲刑
獄忍煩擾存高年恤喪病勤省按聽訟訴刑法所應
和顏任理慎勿以情輕加聲色賞勿漏踈罰勿容親

耳目人間知外患苦禁禦左右無作威福勿伐善施
勞逆詐億必以示已明廣加諮詢無自專用從善如
順流去惡如探湯富貴而不驕者至難也念此貫心
勿忘須臾寮佐邑宿盡禮承敬讌饗饌食事事留懷
古今成敗不可不知退朝之暇念觀典籍面墻而立
不成人也此郡世篤忠厚人物敦雅天下全盛時海
內猶稱之況復今日實是名邦正爲五百年鄉黨婚
親相連至于公理時有小小頗迴爲當隨宜斟酌吾
臨蒞五年兵難騷動未得休衆息役惠康士庶至于
掩瑕藏疾滌除疵垢朝爲寇讐夕委心膂雖未足希

準古人粗亦無負于新舊事任公平坦然無類初不容懷有所損益計近便爲少經遠如有餘亦無愧於前志也

晉書

玄盛寫諸葛亮訓誠以勗諸子曰吾負荷艱難寧濟之勳未建雖外總良能憑股肱之力而戎務孔殷坐而待旦以維城之固宜兼親賢故使汝等未及師保之訓皆弱年受任常懼弗剋以貽咎悔古今之事不可以不知苟近而可師何必遠也覽諸葛亮訓勵應璩奏諫尋其終始周孔之教盡在中矣爲國足以致安立身足以成名質略易通寓目則了雖言發往人道師於此且經史道德如採菽中原勤之者則功多汝等可不勉哉

張顯

上李歆疏

歆字上業高子襲父領涼州牧酒泉公爲蒙遜所滅

士業用刑頗嚴又繕築不止從事中郎張顯主簿氾稱並上疏諫不納

入歲已來陰陽失序屢有賊風暴雨犯傷和氣今區域三分勢不久竝并兼之本實在農戰懷遠之略事歸寬簡而更繁刑峻法宮室是務人力凋殘百姓愁悴致災之咎寔此之由

氾稱

上李歆疏

臣聞天之子愛人后殷勤至矣故政之不脩則垂災譴以誠之改者雖危必昌宋景是也其不改者雖安必亾號公是也元年三月癸卯敦煌謙德堂陷八月

效穀地裂二年元日昏霧四塞四月日赤無光二旬
乃復十一月狐上南門今茲春夏地頻五震六月隕
星于建康臣雖學不稽古敏謝仲舒頗亦聞道於先
師且行年五十有九請爲殿下略言耳目之所聞見
不復能遠論書傳之事也乃者咸安之初西平地裂
狐入謙光殿前俄而秦師奄至都城不守梁熙旣爲
涼州籍秦氏兵亂規有全涼之地外不撫百姓內多
聚斂建元十九年姑臧南門崩隕石於閑豫堂二十
年而呂光東反子敗於前身戮於後段業因羣胡創
亂遂稱制此方三年之中地震五十餘所旣而先王

龍興瓜州蒙遜殺之張掖此皆目前之成事亦殿下
之所聞知效穀先王鴻漸之始謙德卽尊之室基陷
地裂大凶之徵也日者太陽之精中國之象赤而無
光中國將爲胡夷之所陵滅諺曰野獸入家主人將
去今狐上南門亦災之大也又狐者胡也天意若曰
將有胡人居于此城南面而居者也昔春秋之世星
隕于宋襄公卒爲楚所擒地者至陰胡夷之象當靜
而動反亂天常天意若曰胡夷將震動中國中國若
不脩德將有宋襄之禍臣蒙先朝布衣之眷輒自同
子弟之親是以不避忤上之誅昧歿而進愚款願殿

下親仁善鄰養威觀釁罷宮室之務止游畋之娛後
宮嬪妃諸夷子女躬受分田身勸蚕績以清儉素德
爲榮息茲奢靡之費百姓租稅專擬軍國虛衿下士
廣招英雋脩秦氏之術以強國富俗待國有數年之
積庭盈文武之士然後命韓白爲前驅納子房之妙
算一鼓而姑臧可平長驅可以飲馬涇渭方東面而
爭天下豈蒙遜之足憂不然臣恐宗廟之危必不出

紀並晉書

前燕

慕容廆

字奕洛瓌昌黎棘城鮮卑人僞僭號僞謚武宣皇帝

與太尉陶侃牋

廆本鮮卑單于稱藩于晉累進車騎將軍
平州牧遣使與侃牋約以共討石勒使者
遭風沒海廆更寫前牋并齎其東夷校尉
封抽行遠東相韓矯等三十餘人疏上侃
府侃請封爲燕王又報封
抽等書朝議未定而廆卒

明公使君轂下振德曜威撫寧方夏勞心文武士馬
無恙欽高仰止注情彌久王塗嶮遠隔以燕越每瞻
江湄延首遐外天降艱難禍害屢臻舊都不守奄爲
虜庭使皇輿遷幸假勢吳楚大晉啓基祚流萬世天
命未改玄象著明是以義烈之士深懷憤踊猥以功
薄受國殊寵上不能掃除羣羯下不能身赴國難仍

縱賊臣屢逼京輦王敦唱禍於前蘇峻肆毒於後凶
暴過於董卓惡逆甚於僉汜普天率土誰不同忿深
怪文武之士過荷朝榮不能滅中原之寇刷天下之
耻君侯植根江陽發曜荆衡杖葉公之權有包胥之
志而令白公伍員殆得極其暴竊爲丘明耻之區區
楚國子重之徒猶耻君弱羣臣不及先大夫厲已戒
衆以服陳鄭越之種蠡尚能弼佐句踐取威黃池況
今吳土英賢比肩而不輔翼聖主陵江北伐以義聲
之直討逆暴之羯檄命舊都之士招懷存本之人豈
不若因風振落頓坂走輪哉且孫氏之初以長沙之

衆摧破董卓志匡漢室雖中遇寇害雅志不遂原其
誠心乃忽身命及權據揚越外仗周張內馮顧陸距
魏赤壁剋取襄陽自茲以降世主相襲咸能侵逼徐
豫令魏朝旰食不知今之江表爲賢雋匿智藏其勇
略邪將呂蒙凌統高蹤曠世哉況今凶羯虐暴中州
人士逼迫勢促其顛沛之危甚於累卵假號之彊衆
心所去敵有釁矣易可震蕩王郎表術雖自詐僞皆
基淺根微禍不旋踵此皆君侯之所聞見者矣王司
徒清虛寡欲善於全已昔曹叅亦崇此道著畫一之
稱也庾公居元舅之尊處申伯之任超然高蹈明智